

KOONGELEZYA



Syoma buyo, syoma buyo,
Zintu zyoonse zilakonzeka, syoma buyo;
Syoma buyo, syoma buyo,
Zintu zyoonse zilakonzeka, syoma buyo.

² Atu kotamike mitwe yesu. Taata wesu Wakujulu, twa Ku lumba nkambo ka lwiimbo olu, ku kusyoma buyo! Kubona buyo Mwami wesu mbuli Mbwa kaunka ku mulombe wa kajisi kasuntu, kati, “Nda konzya, ikuti na wasyoma, nkambo zintu zyoonse zilakonzeka kuli baabo basyoma.” Mwami, gwasya kutasyoma kwesu sunumasiku, ngo mupailo wesu. Tuli lumbide loko kuli Nduwe nkambo ka Busyu Bwako buli a ndiswe, a bantu abo ba Ku syoma aku Ku yanda. Elyo kuziba lino, kutali kuti tuyoooba, pele lino tuli sumpwidwe mu masena Aakujuju muli Kristo Jesu, katukkede munsi lya Mwaami wesu sunumasiku, katukkede kale munzila yabwana a Nguwe. Oh, obo mbotu Ku lumba ku kaanzambwene aka nko tu jisi muli Nguwe, zisyomezyo Zyakwe, kuziba kuti ta cikonzyi kukakilwa, kuti lyoonse ncabwini. Twa komba kuti Uyo swaya antoomwe andiswe sunumasiku. Akube kuti Muuya Uusalala ubweze Ijwi lya Leza aku Ly a baula ku myoyo yesu mbubonya mbuli mbotu jisi kubula, kutegwa cindi twa zwa sunumasiku, kuunka ku minzi yesu, tu kaambe mbuli baabo bakali kuzwa ku Emau busiku bumwi, kuti, “Sena myoyo yesu tii yali kupya muli ndiswe mbuli Mbwali kukanana kuli ndiswe mu lweendo?” Nkambo twa cilomba mu Zina nya Jesu. Ameni.

³ Inga mwa kkala. Ndili kkomene loko kujokela lubo sunumasiku, ku kanana kuli ndinywe a kuswaangana a ndinywe, ku zintu ezyo zizulilwa kuli Kristo. Taakwe bukanze bumbi mbo tu jisi bwa kuba kokuno, pele kucita ceeco, kuswaanana buyo aa Ijwi Lyakwe.

⁴ Nda usa lyoonse Ndi mukkazika kwa ciindi cilamfu mukumuka busiku abumwi. Muntu umwi waka ndaambila, kati, “Bantu okuno baunka ku munzi aa eiti theeti na naini kuloko, kuzwa ku mbungano.” Pele Ndi—Ndi muna musanza buyo, a kubaanga nkuneelela, nywebo mulizi. Elyo Nse konzyi ku ciyeeya cakufwambaana loko. Nde elede buyo kubaanga nkuliiba ancico mu ciindi cangu.

⁵ Pele Ndili lumbide ncobeni ku kubelekela antoomwe kubotu oko...oko Nkwe jana kuzwa kuli ndinywe no bantu omuya, abo basyoma ali Leza. Kubelekela antoomwe kwantu—kwantu cicibamba kuuba loko, acalo, ku Muuya Uusalala kweenda akati ka bantu. Nda lombozya kuti ni Ndali kukonzya kujana oku kulikonse, Nda—Nda cita, oko nko konzya kujana

bantu basyoma. Tacikwe makani eco Leza ncacita, kunji buti kwa cipego Nkwa konzya kwiiminina, mweelede ku cisyoma, mwabona, nkaambo tacikwe nguzu citakuti mwa cisyoma.

⁶ Jesu ciindi cimwi, kaboola kuzwa ku cisi cimbi, kaboola kuli Bakwe Beni. Elyo ba kati, "Twa kamvwa kuti Wa kacita *boobu a boobu* ku busena obu," pele mpawo Ta kali kukonzya kucita milimo minji yanguzu. Lino ta tubotelwi ku caamba mu nzila eyo, pele nje nzila eyo Lugwalo mbolu caamba, kuti Wa kali kukonzya kucita . . . "Ta kali kukonzya kucita milimo minji yanguzu, nkaambo ka kutasyoma kwabo."

⁷ Elyo nguzu zya Leza zila golela ku lusyomo lwako muli Ndilyo. Mwabona? Nko kucesegwa kulikke nko zjiszi, lwalo ndusyomo lwako. Elyo ikuti na . . . Zintu zyoonse zilakonzeka kuli baabo bayo cisyoma. Mwabona? Kuli Leza mupati ku Julu, elyo ikuti na twa njila buyo mu kukwabana, mbuli kukwabana kwa cigaminina kuli Nguwe, zintu zyoonse zilakonzeka. Mwabona? Pele twe elede kuboola mu kukwabana a Nguwe, kakutakwe kugaba ali onse, nzila buyo isoolokede akati ka ndiswe a Leza. Mpawo Wa kati, "Ikuti na waamba ku dundu eli, 'ko zyuka,' a kuta donaika mu moyo wako, pele kusyoma ceeco nco wamba." Lino, to konzyi kucengeezya ncico. Saatani takonzyi kucengeezya cabutete loko, aboobo to konzyi kucengeezya kuli ncico. Pele cindi wano cizi ncobeni, nkokuti ceelede ku citika, mwabona, ceelede buyo ku citika.

⁸ Aboobo tuli waano, aku Mu komba, alimwi Walo mubotu a muyandisi kapati wa zyuulu zili kkumi ku buntu bwesu. Elyo tuli kkomene ncobeni kukkala waano a ndinywe, sunumasiku, mu ciindi eci cibotu ca luswaanano.

⁹ Lino, nywebo nomu yanda kubala Ijwi, na kweengela masena. Nda yeeya sunumasiku, kali ku kambauka maningi aa kuponesegwa kwa Buleza, Nda baanga ndacinca ciyo sunumasiku, anini biyo. Kutali ku cicinca cigaminina, pele bweende buyo bwa ncico. Nkaambo, to konzyi ku cinca Ijwi lyomwe mu Bbaibbele, nkaambo cila swaangana antoomwe a Majwi ambi a Ndilyo. Magwalo onse alajatana ncobeni antoomwe. Cili mbuli ii—ii . . .

¹⁰ Mundijatile, ikuti na eci cilimwwisia kusanka cisetekene, elyo inga Nse cikanzila mu nzila eyo, pe. Pele cili buyo mbuli cisolo, nywebo mulizi. Twa kali kunga twa bweza zisolozjakaindi zya kakosaulwa koonse—koonse, elyo mpawo twa kali kunga twa kkala ansi a kulangalanga obo bwa ku cibikkidwe antoomwe. Elyo mpawo twa kali kuba a cintucimwi cibikkidwe ku lubazu, cifoto ca ceeco nco twakali kusoleka kubikka antoomwe, kubamba cisolo kuzwidilila kuba kabotu. Ikuti na tokacita, nota—nota kakonzya kucicita.

¹¹ Elyo lino nje nzila eyo Lugwalo mbolubede. Lwa katendaulwa mbuli boobo, kusiswa kuzwa ku meso aa

basibusongo a basimaanu; mwabona, bali mbuli ba Farisi, basicikolo batapi bacenjede. Elyo Jesu waka lumba Leza kuti (Lyalo) Wa kasisa Eelyo kuzwa ku meso abo, nkabela uyo Li yubununa ku bavwanda mbuli bang a baiya.

¹² Lino ikuti tuyanda mukozyanyo wanu, kubikka ambali bupange bwanu, kubona eco Magwalo ncaenda acalo, kubikka buyo Jesu awa akuunka ku Mu langilila, aku cibikka mu Bbaibbele. Mu jisi cintucoonse kacizwidilide kabotu, nkaambo nciyubunuzyo ca Jesu Kristo. I—i Cizuminano Cipy a Cakale, zyobilo, zyoonse zikanana Jesu, mwabona, Jesu Kristo Mwana wa Leza, nkaambo Ngu (i) eli Bbuku lya Lununuko. Wa kali Ijwi, alimwi Walo ndi Ijwi, alimwi eelyo lileelede kuba Nguwe, nywebo mwabona. Aboobo eli nde Bbuku lyoonse lya Lununuko, lili ngu Jesu Kristo, libikkwa ca kweelela kabotu antoomwe kwiinda kuli Leza; a zisyomezyo zya lununuko a kuponesegwa, a zintuzyonse, zya muntunsi. Mwabona? Sa mwacimvwa lino? Eli Bbuku ngu Jesu Kristo, wakabikkwa antoomwe kwiinda kuli Leza. Mwabona? Elyo Wa kaboola mbuli muntunsi a ku tunununa, alimwi cisyomezyo acimwi cili muli Nguwe, alimwi canu, nkambo Walo Munununi.

¹³ Atu jule sunumasiku mu Cizuminano Cakale, kujana ceeco nco tu lombozya kupangila ciyyo cesu, mbuli mbo tubala kuzwa muli Isaya, cipati ca 6 ca Bbuku lya musinsimi Isaya.

¹⁴ Nda botelwa malembo aa Isaya. Wa kali musinsimi mupati. Sena mwaka sola kuziba kuti Isaya wa kalemba Bbaibbele mbolizulwa, mbuli cizibisyo buyo kuli Ndilyo? Wa kacita. Isaya utalikila mu bulenge, akati ka Bbuku kwasika Johane Mubapatizi, alimwi wamamanino mu Mileniamu. Aboobo wa... Kuli Mabbuku ali makumi ali cisambomwe acisambomwe mu Bbaibbele, macapita ali makumi ali cisambomwe acisambomwe aa Isaya, aboobo calo ncimvule ncobeni cakumbele buyo ca Bbaibbele mbolizulwa.

¹⁵ Lino atubale kuzwa ku cipati ca 6.

Mu mwaka oyo... Uzia ngwa kafwa Nda kabona awalo Mwami kakkede atala aa cuuno cabwami, atala... kasumpulwa, elyo malongwe akwe akazuzya tempele.

Elyo atala lya ncico kwa kaimvwi ba serafimu: umwi aumwi wa kajisi mababa ali cisambomwe; obilo wakavumba kumeso aakwe, alimwi obilo akavumba matende akwe, elyo obilo ngakali kuulusya.

Elyo umwi wakoongolweda umbi, a kuti, Uusalala, uusalala, uusalala, walo Mwami Leza wa makamu: nyika yonse izwide bulemu bwakwe.

Elyo zikunguzyo zya mulyango zyakazungaana ku jwi lyakwe, elyo lyakoongolola, nkabela ng'anda yaka zula busi.

Mpawo Nda kati, Maawe kuli ndime! nkambo Nda nyonyooka; nkambo Ndili muntu wa milomo iitasalali, alimwi Ndi kkala akati ka bantu bamilomo iitasalali: nkambo meso angu abona Mwaami, MWAMI wa makamu.

Mpawo kwa kauluka umwi waba Serafimu kuli ndime, kajisi kkala liyaka mulilo mu janza lyakwe, elyo ndya kabweza kubelesya lumano kuzwa ku cipaililo:

Elyo waka libikka aa mulomo wangu, a kuti, Bona, eli lyu guma milomo yako; nkabela milandu yako yagusigwa, a zibi zyako zya salazigwa.

Akwalo Nda kamvwa Jwi lya Leza . . . jwi lya Mwami, kaliti, Nguni Ngweyo tuma, alimwi nguuli uyo . . . na nguni uta twi inkile? Mpawo Nda kati, Mpaawa mpe Ndi; kondi tuma.

¹⁶ Ndi yanda kubweza cibalo, na inga twa ciita booboo, aa ciiyo ca *Koongelezya*. Koongelezya ncintu cipati. Twa kaambilwa ku, Lugwalo, kuti, “Tuli magwalo aalembedwe, alimwi aabalwa ku bantu boonse.”

¹⁷ Elyo swebo, mbuli Banakristo, twe elede kulangisya lyoonse eco ncotu cita a nco twaamba, kuti tula syomeka cakulondoka ku muntu onse. Elyo yebo, ikuti na tokonzyi kusyomeka ku muntunyoko, ncobeni toka syomeki kuli Leza. Aboobo obo mbotu belekela Leza, nkuti, tula belekelana umwi aumwi. Mbuli kusyomeka Mbwe konzya kuba kuli ndinywe, nko kusyomeka Nkwewyo konzya kuba kuli Leza. Elyo eyo nje nzila njiyonya a ndinywe kuli ndime. Twe elede ku syomeka kuli umwi aumwi mu nzila zyoonse zya milimo yesu.

¹⁸ Elyo muntuumwi ula tu langilila. Inga kota yeeyi boobo, pele kuli meso akulangilila. Alimwi buumi bwako boongelezya muntuumwi. Ambweni mwana muniini, alimwi oyo imwana kwayanda uyo komena kuba Finney umbi, na Moody, na bamwi bambi. Ta tuzi. Pele buumi bwako—bwako boongelezya muntu umwi.

¹⁹ Elyo bubambe bwesu sunumasiku bwalo mbubambe bupati bukubwene ali ceeci, nkaambo ndazwaa kucibala buyo masikati aya, cindi Neli kubala, Ndali kuyeeya obo bupati Leza mbwabede.

²⁰ Cifumo cino, cindi mwana wangu a Ndime ni twali kubaanga nkwendenda kuzunguluka i—i mundando wa mayake, kwali bantu banji maningi. Twa selemuka kuzunguluka Times Square, nkambo ba kaamba kuti bakali kuyo inyonyoona. Ndi yeeya kuti mbu— . . . i—i mulimo waka talika kale. Aboobo Ndali kulanga ali ceeco, alimwi twali kufotola zifoto. Elyo bantu, kuvuzyanya! Nda amba ku mwana wangu, Billy, Nda amba, “Nkokuli boonse nko baunka? Ino kubindilwa nzi? Mbaaba mpobabede, kunsi Iyesu kwini, baya buzuzaana; alimwi mpaawa, baya buzuzaana;

alimwi mujulu atala lyesu, baya kuzuzaana. Nda... Nkokuli bantubonse nkobaya mu kubinda kuli boobu?"

²¹ Elyo mbuli mbu twa imvwi, twa zoyeeya ceecei, "Mbobuti Leza mbwa konzya kuziba miyeeyo ya muntu aumwi? Alimwi mbobuti mbo eikonzya kuba kuti i—i mabbilioni onse ali mu nyika, elyo nekubabooobo Leza ulizi ciindi conse no laba liso lyako?" Walo mupatikampatila.

²² Elyo ikuti na tuyanda buyo kuziba, aku kkutya buyo ceeco, ikuti na casola kuboola mu mizeezo yanu, kamuya anze a kulanga mujulu ku nyenyeesi a kulibuzya obo Mbwa endelezya zyoonse ezyo, mpawo tuyobona mulimo musyoonto mbounga waba. Cindi ezyo nyenyeesi, mula konzya kubona mwaanda amakumi obilo amamilioni akweenda kwa mumuni mu mwaka, kwiinda mu bbainokkilasi; mulizi obo cakufwambaana mumuni mbo weenda, baa, ula konzya kuzungulusya minkali ili fuka kuzunguluka cisi ca New York, inga tii wa konzya kwapaula mu mamaile. Elyo kwiindilila ezyo kuli nyenyeesi zinji zinji mbuli ziliko kulubazu olu, okuya ku Cilundu ca Palomar a Cilundu ca Wilson okuya mu California, cila konzya kubonwa.

²³ Amuyeyeye obo Mbwali mupati, aboobo Mbwa jatilila nyika! Nyika eyi, na imwi ya nyenyeesi ezyo inga yazwa mu busena bwayo, mamiloni a mabbilioni aa mamaile kutantamuka, inga kwacinca nyika eyi. Obo bweende boonse bwa zuba amapulaneti alizunguluka bwakkala buyo abusena bwa mbubo. Elyo, mwabona, zintuzyonse Leza zyakapanga, mbuli ezyo, zila muswiilila Leza. Pele cindi Leza nakalenga muntu, muntu wakali bonya kuyanda kuziba kunji kwiinda Mbwa cita, nywebo mwabona; nku, ndiswe biyo notuzwide mu busena. Zila kkala mu busena. Alimwi zyeede kukkanala mu busena, kutegwa zyeendelane cimwi acimwi.

²⁴ Kupa mukozyanyo, mweezi, ikuti na mweezi wasola kuzwa mu busena bwawo, inyika inga yazula meenda, mu ziindi zisyoonto. Mwabona, i—i mweezi uli—uli mubwini uli mbuli mulindizi wa lwizi. "Ula bamba minyinza yawo, cakuti ta konzyi kwiinda." Elyo cindi mweezi wanyona kuzwa ku nyika, mpaawa kwaboola kufuta kwa maanzi mukati. Ikuti na mweezi tiwa kujata ku lubazu lumbi, inga avumba nyika. Mwabona? Aboobo mweezi ulaima alimwi—alimwi ula vuuluka kulanga koonse ku lubazu lumbi lwa inyika, elyo—elyo mpaawa kuboola meenda kaanjila cakufwambaana loko, elyo mpawo ulanyona alubo. Walo mulanda wa Jehova. Lwizi lulaimaaku jokela ku busena bwa ndulo alubo, nkaambo lulabona kweenda kulondokede kwa Jehova.

²⁵ Oh, ikuti swebo mu mbungano, mbuli zizo zya Mubili wa Kristo, twa konzya biyo kubeleka mu lumvwano mbuli boobo, inga mwabona Mbungano mpati yanguzu ya Leza muumi, yoonse mu bubambe bomwe buli kabotu, kiizwide a Muuya

Uusalala. Sena inga tiicaba cibotuloko? Cizo acimwi ca Mubili kubeleka bweelede buyo aa busena bwaco, cipego coonse ku busena bwaco, cipego coonse kugwasya cimbi, cizo acimwi kugwasya cimbi, eco inga cabotaloko. Nce ncico nco tu yanda kubona. Pele tuyu cibona buzubabumwi, a kuti na cili kabotu.

²⁶ Lino, oyu mulombwana mukubusyi, Uzia, wakali mwaami. Pele katanaba mwaami... Wa kali mwaami ku bulelo bwa Isaya, musinsimi. Alimwi wa kali mulombe mweembezi; wa kali kuyandisya mu miinzi. Wa kali koongelezya kupati ku—ku buumi bwa Isaya. Isaya wakali mulombwana mukubusyi, awalo, musinsimi buyo mukubusyi. Elyo amubale kaano, ikuti na muyanda kulemba Makani Aabil 26, kuyo mwaambila. Obo kukomena kwa kkumi acisambomwe, nikwa kamana lufu lwa bawisi balulami, wa kaba... ba ka mubweza aku mupanga mwaami wa Israyeli. A kukomena kwa kkumi acisambomwe wa katalika kulela. Elyo wa kali bwene koongelezya kwa bazyali bakwe; banyina bakali mwanakazi munaleza, a bawisi bakali mwaalumi munaleza, kumbele lyakwe. Elyo, muli ceeco, caka bikka koongelezya mu imwana ku cita ceeco caka luleme.

²⁷ Nda mwaambila. Ndi yeeya kuti, sunu, tu jisi oko kuvula kwa kusunda ikwa bakubusyi konse ku cisi, pele, ncobeni, Ndi yeeya kuti kwa katalikila mu ng'anda. Ndi—Ndi yeeya kuti bazyali ba kalekela ku citika. Elyo ikuti na imwana waka komezegwa mu ng'anda yakaindi, mbotu, yabunaleza; Nsy aambi kuti inga caba koonse, embo ncobeni, pele ncobeni inga kwapa imwana oyo musyobo uluzi wa koongelezegwa. Ndi yeeya kuti, ziindi zinji, kuti, maanda ayo bana mu baka komezegwa mabi, bakalekelwa mu kagwagwa, elyo ba kaliponena buyo beni cindi banyina niba kali kukkanala mu bbyaholo, na i... a bawisi, abamwi bambi. Taba mubikkili maanu oyu imwana. Cintu cimbi, taba muyandi aku mupa luyando, ku mukomezya. Walo musyoonto. Mweelede ku muyiisyia kuyanda a kulemeka, a ku bala Bbaibbele.

²⁸ Ndi yeeya Susanna Wesley. Ndi yeeya kuti waa kajisi bana bali kkumi aciloba. Ndi yeeya kuti mbo mbubo. Pele waa kali kujana maoora obilo na kwiinda, abuzuba, ku paila. Kunselelo ku i—i mamanino aa dreesi lyakwe, aawo balombe baniini mpo bakali kufugama cakuzunguluka, kuzwa waawo kwaka zyalwa John a Charles abo bakacinka bweende bwa inyika, kafutula inyika mu buzuba obo. Elyo taka jisi muncini wa kuwaccila amuncini wakuyumya, mbuli mbo tu jisi sunu, amuncina wakusanzizya mitiba, a zimwi zimbi, na musimbi ubeleka. I cintu eco... Waa kakucita koonse alikke, pele nekubaboobo wa kali kujana ciindi nkaambo waa kali kubikka koongelezya ku bana bamwi abo kumalekelo ba kacinca bweende bwa inyika. Ndi yeeya kuti oyo mutumbu waciyanza cakaindi, munzi waciyanza cakaindi, kwakali mupailo a kumvwisya kwa Bbaibbele.

²⁹ Nda syoma, Abraham Lincoln taakwe naka jisi bbuku mu buumi bwakwe, kusikila nakakomena, pele Bbaibbele a... Ndi yeeya kuti ambweni lyakali lya Bbuku lya Foxes Ilya Basikufwida buzumini... Ndiza nsecita, kwayanda lya bbuku limbi. Ndi yeeya kuti lyakali Kuzwidilila kwa Muzwamasi, mu kululama. Lya kali lya Kuzwidilila kwa Muzwamasi, a—a Bbaibbele. Sena mwabona musyobo wa ciimo caka bumbwa?

³⁰ Amu ndilekele buyo kunjila mu ng'anda yanu a kubona musyobo wa zifoto nzyo mujisi ku bwaanda bwanu. Mu ndileke kwiinka ku ng'anda yanu na ofesi yanu, alimwi atu bone musyobo wa ziimbo zilila. Mwabona? Eco neco mubala, eco neco mulanga. Nda konzya ku mwaambila kabotu eco cili mukati kanu, mwabona, nkaambo cilida ali ceeco. Mwabona? Elyo, oh, ku munzi, ikuti na twa kapanga munzi mubotu loko, bana inga tii bayanda kutija. Amu bapangile zintu zinji zyabo, awo mpo balimvwa kutambulwa kabotu a kulikwaya kabotu aa munzi; oko, munzi, taba konzyi kulindila mane bala sika oko. Elyo nje nzila munzi mbo weelete kuba.

³¹ Elyo Ndi yeeya kuti oyo ngo musyobo wa munzi Uzia mwaka komenenamo, nkaambo ka koongelezya kwa baziali bakwe banaleza. Elyo mbwa kabeda biyo mwaami, taka bikkila maanu ku mizeeo ya mpuwo a kwiimpana koonse kwa tunzenyu, elyo wa kabikka muzeezo wakwe ku cintu comwe: wa kali kuyo belekela Leza, kakutakwe zyakulanganya! Tuya ndikana basitunzenyu banji mbuli oyo. Walo, wa kali kanzide kuti wa kali kuyo belekela Leza, nkaambo nje nzila eyo njaka komezegwa, elyo bawisi baka mupa koongelezegwa kululeme, kuti wa—wa kali kukonzya kubelekela Leza a kupona.

³² Elyo bwami bwakwe bwakali bulemu maningi kusikila, Nda syoma, bwakali kutobela bwami bwa Solomoni. Nda syoma kuli bwenwe kutobela bwami bwa Solomoni. Obo Leza mbwa kamu longezya!

³³ Elyo oku kwakali koongelezegwa kupati kuli oyu musinsimi mukubusyi, Isaya, oyo wakali ku tempele ku ciindi eco, na mu cisi. Elyo obo mbwa ka bonwa, a boobo Leza mbwakali kuyolongezya mutu oyo wakabweza ntaamo iiluleme, wa cita cintu ciluleme, waka jisi kaambo kaluleme a bukanze bululeme, nkabela wa kacita kabotu.

³⁴ Ziindizimwi inga wayeeya kuti tacipi bulumbu. Pele ncobeni cilapa bulumbu. Ceelede kuba bulumbu. To konzyi kutozya kumbo a kujwe aciindi comwe. To konzyi kuunka ku lulyo a ku lumwensi aciindi comwe. Inga wayeeya kuti uunka nzila imbi, pele tociti. Aboobo ikuti na wa bikka muzeezo wako—wako a meso, a twaambo a makanze, mu buumi, aa cintu ciluleme, weelete kuyutukila aa cintu ciluzi. To konzyi kukakilwa. Mwabona? Eyo nje nzila ilikke. Tacikwe makani mbo sunkwa kucita lubazu lumbi, nyona mutwe wako kuzwa kuli ncico a

kucita ciluleme. Elyo uli—uli zyi kuti uli luleme; uli mvwa kabotu kapati, alimwi uli kabotu kapati. Elyo nku koonse buyo kuliko kuli ncico, uli jisi... uyo yutuka koli kabotu. Wa talika kuunka kumbo, to ka—to ka taliki kuunka ku nyiika, yebo uno inka... uno inka kumbo. Elyo nje nzila njiyonya mbo kubede mu ciluzi aci taluzi.

³⁵ Elyo Isaya wa kabona ceeci, alimwi wa kabona kuti Leza wa kamulongezya. Elyo obo mbwa... zisi zyonse, zyaka zungulukide, mpuwo yakwe yakaunka kulaale mu Egepita. Elyo obo zisi mbuzya takali kuyanda nkondo a nguwe, ba—ba ka bona kuti Leza wakali a nguwe. Aboobo walo buyo... Ba ka mutumina zipo zya luumuno a matanga aambelele, a zintu, a—a ku cipa kuli nguwe, kucitya luumuno. Elyo wa kali muntu mubotu.

³⁶ Elyo Nda syoma ikuti na cisi, na bantu, na mbungano, na mugame, takukwe makani obo kunji basikujana butongo mbo ba kukazya, ko cita buyo cintu ciluleme. Bali jisi bulemu kuli nduwe, kunsi kwini kwa moyo wabo. Alimwi Nda kajana eco kuba bwini. Mwabona? Alimwi kosyomeka alimwi kolulama. Bantu bayo lemeke eco. Elyo nekubakuti bali lubide, ba cicilemeka, nywebo mwabona, nkaambo walo—walo mbantunsi buyo. Tuli bantunsi toonse, alimwi tu—tu lizi kuti kuli ciluleme a citaluleme, elyo twe elede kubweza ceeco.

³⁷ Elyo—elyo Uzia wa kajatilila ceelesyo eci. Wa kali koongelezya kupati, mbuli Mbwe amba, kuli Isaya musinsimi.

³⁸ Elyo mpawo Uzia wa kapanga bulubizi obo bubyaabi, mbubonya buyo mbuli bantu bamwi banji mbo bacita. Cindi na kaba, kalimvwa kukwabililwa, wakalimvwa mbuli kuti wa kajisi buyo cintu coonse mu janza lyakwe, wa kasumpulwa mu muuya wakwe. Wa kasumpulwa, ku kulisumpula. Lino ngooyo mukozyanyo wini kuli ndiswe toonse.

³⁹ Nywebo mulizi, elyo nde penzi. Ndi—Ndi kanana ku Banakristo a—a bakutausi, alimwi Ndi—Ndi yanda kusyomeka kujatikizya zintu ezi. Elyo awo mpe mpawo buyo bakutausi banji akwalo mpoba pangila bulubizi. Twa kamvwa ziindi zinji maningi kujatikizya bakutausi, i—i micito eyo njoba cita, a—a zintu, bamwi babo ambweni bacita zintu nzoba teeletee ku cita. Ndi yeeya kuti ziindi zimwi, balo mbantu babotu, Banakristo bali kabotu loko abo ba kabelesegwa a Mwami. Elyo mpawo kumalekelo bayakilwa bwami buniini kuli mbabo, na koongelezegwa kunji, bantu banji kujanika ku miswaangano yabo, kusikila ta babikkili maanu, nkabela ba baanga nkusumpulwa. Bantu bala balumbaizya a kwiimikila, elyo—elyo ta—ta twe elede ncobeni kucita ceeco. Swebo, amuyeeye, tuli buyo koonse...

⁴⁰ Kunyina badundumutule akati kesu. Tuli—tuli bana ba Leza buyo toonse, nywebo mwabona, ikuti na Leza wa kapanga

bamwi besu cintu comwe a bamwi cimbi. Baa, Wa kandipanga munwe a liso, abumwi bumbi. Ee, twe elede kulumbana umwi aumwi, alimwi mpawo kutali kusola kulimvwa kuba dundumutule. Nkaambo, toonse tuli swaangene antoomwe kuli Leza omwe, mwabona, elyo toonse tuzwa ku cisamu comwe. Mwabona?

⁴¹ Elyo lino tu jana kuti, ziindi zinji, bakutausi basika mpo ba limvwa buyo kukwabililwa aniini, alimwi bala zumanana kusololela nzila, alimwi, cintu citaanzi nywebo mulizi, bayo cita zintu nzo ba teelede kucita. Elyo tu lizi obo, ziindi zinji, bantu baluleme a babotu bayo sika booboo cakuti bayooba makani aabuleya manji kapati, ba yanda buyo kuunka ku mapobwe mapati, alimwi, cintu citaanzi nywebo mulizi, bayo yitila kakunywa kaniini, mu ziindi zimwi, nkabela bala cegwa ku inyika. Elyo Ndi yeeya kuti ndepenzi a mambungano esu sunu. Ndi yeeya kuti ndepenzi a mulimo wesu wa Pentekoste.

⁴² Lino andaambe ceeci lutaanzi, caantangalala. Mwabona? Mula ndimvwa kwaamba zintu kujatikizya mbungano ya Pentekoste. Alimwi Ndili muna pentekoste. Mwabona? Pele, okuno, ino kuti nikwa talikwe bantu ba pentekoste mu New York, sunumasiku, nkokuli Nkwe konzya kuunka kuyo kambauka Mulumbe oyu? Mwabona? Nda balumba bantu ba Pentekoste. Mbakwesu a bacizi bangu.

⁴³ Pele nekubabooobo cindi Nda bona cintucimwi cilubide ku mukwesu wangu, imwana wangu, na ba mukaintu wangu, na kufumbwa mbu cabede, ciluleme cili luleme. Ii muzyali uluzi uyo lulamika bana bakwe.

⁴⁴ Elyo Ndi yeeya kuti penzi ku mbungano yesu, tu sola kuba maningi mbuli i—i bamwi. Mwabona? Tu sola kulilemeka mbuli muntuumwi umbi, nywebo mwabona, alimwi—alimwi tu talika kubweza zilengwa zyabo. Elyo cintu citaanzi nywebo mulizi, kwa kali kunga . . .

⁴⁵ Nse bayeeyi bantu ba Pentekoste ku matalikilo abo, mubwini, ba kaliko kwa myaka minji yakainda, mu mulimo oyu wamamanino kuzwa ku Kagwagwa ka Azusa, pele Nda kabweza makani akale anjiyo. Elyo Nda—Nda kabala mabbuku manji, aku kanana kuli bamadaala bamwi. Kulibambilila kuba a muswaangano ndyoonya lino aumbi ku Shreveport, Louisiana, uyo bako, wakali umwi wa bantu bataanzi mu Kagwagwa ka Azusa. Elyo mpawo nge matalikilo aa pentekoste mu cisi eci, kutandila myaka ili makumi osanwe ailmwi yakainda, Nda yeeyela. Nda kakambauka jubbili yakuzwidilila maningi ku tempele lya MacPherson, Tempele lya Angelus mu Los Angeles, myaka misyoonto yainda, jubbili yakuzwidilila maningi ya mwaka wamakumi osanwe wa pentekoste, lino, nywebo mwabona.

⁴⁶ Pele kuzwida leelyo, kwali zintu zinji loko ziniini ziya bunjila mu mbungano, nkaambo mbungano yakali kucumbana makuko a nyika buzuba abuzuba. Lino, alimwi Nsya ambi ku—ku jokela kuli ceece alubo, ku—ku bacizi besu, mwabona, bakwesu besu. Ziindi zinji, kwakali kunga myaka yakainda, kuti cakali lubide (nkambo mbuli Mbwe kaamba busiku bumwi) ku bacizi besu kugela masusu, abo. Bwakali ii—ii mucito wa ba Pentekoste, kuti tiiba keelede kucita boobo a zintu ezyo. Pele ino ncinzi? Lino tula unka mu zibbeela zyandeene zya cisi, elyo tu jana bacizi besu ba Pentekoste akooko kugelwa musyobo watala amutwe, nywebo mulizi, bubambe upati bwamasusu mu nkata mbuli yeeyo. Elyo ula konzya kubazibya kujatikizya nkuko. Alimwi bala belesya misila. Ba—bala sama zisani mbuli baalumi.

⁴⁷ Elyo nywebo mwati, “Lino, Mukwesu Branham, wasalulula banakazi.”

⁴⁸ Lino amulindile kwa kaindi kaniini, andi salulule bamaalumi. I—i mukwesu uyo lekela mukaintu wakwe kucita ceeco, tali mweendelezi mubotu ku ng’anda yakwe. Mwabona? Mwabona?

⁴⁹ Ta mweelede kucita boobo. Pele ino ncinzi? Twa cumbana makuko abamwi babo, bakompeme bamwi baniini baka njila kuzwa ku seminar imwi na cikolo, a kuba amuzeego wandeene wa ncico. Pele kuli mukozyanyo omwe biyo ulondokede, nkuti, kujokela nkoonya ku Bbaibbele. I Bbaibbele lila kasya eco, mwabona. Alimwi taciluzi.

⁵⁰ Elyo mpawo tu jana zintu zimbi. Ca kali lubide ku bantu babusalali kujanika ku bbaosikopu na zipekupeku, nywebo mulizi. Lino bala unka ciindi coonse. Mwabona? Elyo mpawo Saatani waka musomweda cimwi cakufwambaana ali ndinywe, kabikka televizhini moonya mu ng’anda yanu, elyo, mwabona, kacibikkha mukati omuya. Pele zintu ezi zyoonse, ya kali kunga ta yeelede.

⁵¹ Ee, ino ncinzi? Mwabona, cila njila bucebuce loko kusikila, cintu citaanzi nywebo mulizi, caka mujata buyo. Cili mbuli musaansa uukomena munsi lyanu. Lino, ikuti na moyo tantamuna oyo musaansa kuzwa kuli ndinywe, mwabona, a kuzumanana buyo kulizambaila ali Jesu, kulizambaila aa Ijwi akukkala a Ndilyo, mwabona, moyo komena kamululeme. Eco nca bumpelenge alimwi cimu kwela buyo kuzwa mu mugwagwa. Kristo ukukwelela mujulu. Eco cikukwelela ku lubazu.

⁵² Elyo mpawo wabona mwanakazi omwe, mbuli mwanakazi wa mukutausi, na mukutausi, watalika kucita cintu cimwi, mbungano yakwe yoonse iyooti, “Ee, mweembeli wesu ula cicita. I mukaintu wa mweembeli ula cicita. Nkaambonzi neco tu teelede kucita ceece?” Wabona, uli mukoongeleya muntuumwi,

elyo koba masimpe kuti uboongelezya kabotu, kugama ku mugwagwa ululeme a zintu zya kucita ezyo ziluleme.

⁵³ Lino tu jana kuti, cindi wa sumpulwa, mpoonya awo uli mu lweendo lwako lwansi, wabona, cindi wali sumpula lwako.

⁵⁴ Elyo lino tu jana kuti oyu Uzia, waka sumpulwa nkaambo wa kalimvwa kukwabililwa, zintuzyonse kazi muzungulukide. Wa—wa ka jisi cisi cakwe, alimwi cakali kubambwa kabotu, alimwi Leza waka mulongezya. Alimwi wa kajisi myuunda yamasasaansa mipati, a matanga aang'ombe a mbelele, a—a migodi, a buvubi mu zintuzyoonse. Elyo zisi zyoonse zyakali mu luumuno a nguwe. Aboobo wa—wa kasumpulwa loko mane wa kayeeya kuti wakali kukonzya kucita cintu cili coonse eco nca—nca kali kuyanda ku, a kulisumpula.

⁵⁵ Wa kasumpulwa loko kusikila wa kasola kubweza busena bwa mukutausi. Wa kanjila mu tempele, a kubweza kanunkilizyo a kuunka ku cipaililo. Elyo cindi na kacita, mupaizi waka muzuzilaaku mwaambila kuti ta keelede kucita ceeco. Elyo cindi naka lulamikwa, mucibaka cakilibombya mbuli mbwakali kunoba... Katana sumpulwa, na kati, "Mbo mbubo, Nse jisi—jisi nguzu zya kucita ceeci," alimwi naka tumina aansi kanunkilizyo na ku katambika ku mupaizi oyo wakali Aaroni, waka salidwe kucita boobo, waka salazidwe alikke ku mulimo oyo.

⁵⁶ Nde enda cikubwene aniini a i—aba Bantu Basimakwebo iba Makanimabotu Aazwide okuno. Bunji bwabo balikkede moonya muno lino. Elyo Nde elede ku kanana ku kalimbabula kabo, Mujibelo, Mujibelo cifumo kuli imwi... Inzi? Hotela lyaku Startler, Nda syoma nde ndilyo. Ba kaamba kuti bakasambala kale matiketi ali myaanda ili kkumi aciloba aaku kalimbabula.

⁵⁷ Aboobo mpawo, kutali kaindi loko, Nda kali kukanana a mbabo. Elyo bakali kutola bantu basimakwebo atala lya cibumbili, kutola zibalo zyabo a ku kambauka Makanimabotu. Nda kati, "Eco cili lubide." Calo cili lubide ncobeni. Nei yumu loko kuli ndiswe to bakambausi ku Ci tonkomeka; kulekela kubweza simakwebo oyo utasalidwe ku cintucimwi mbuli ceeco, kuti muleta mizeeo miniini, azimwi zimbi. Elyo Nda kati, "Ta mweelede kucita ceeco."

⁵⁸ Muta soli kubweza busena bwa mulombwana umbi. Leza waka kupanga cintu cimwi, nkabela kokkala obo. Mukasimpe. Kokkala buyo obo mbobede. Uta soli kukkopela umbi. Neencico eco lyoonse cinyonganya zipego ezyo Leza nzya tuma ku inyika. Tu jana kulikozyanisa kunji kapati kwa businyama, alimwi tu jana kuti muntu umwi usola kukkopela umwi umbi.

⁵⁹ Mboli mboba kaamba ku bakutausi balindu, cindi Muka. McPherson nakali kupona, elyo onse mwankazi mukutausi wakasama mababa ayo mboli mbwaa kacita, na kufumbwa mbo

cakabede, alimwi baka jisi Mabbaibbele abo munzila njiyonya. A zintu zyonse ezyo nzya kacita, ba kacita.

⁶⁰ Tula bona kuti tu jisi ba Billy Graham banji kapati sunu! Pele nywebo mwabona, Leza takalenga pele biyo omwe Billy Graham. Kwa mana. Wa . . .

⁶¹ Elyo mula yandikana maningi buyo mbubonya mbuli Billy Graham, Oral Roberts, na kufumbwa wa baabo baalumi bampuwo. Ula yandikana maningi kusikila biyo mwazwa mu busena bwanu, elyo mpawo tamukwe bugwasye pe, nywebo—muli—muli cilebyo ku—ku bantu aba, alimwi muli cilebyo kuli lwanu a Bwami bwa Leza. Amukkale mu masena anu. Mwabona? Amube obo Leza mbwaka mupanga, mwabona, elyo mpawo myo beleka kabotu.

⁶² Mbuli Paulo, tacili cintu cipyia, Paulo wakayiisya cintu nciconya, kati, “Ikuti na janza liyooti ku liso, ‘nkaambo Nseli wa liso,’ na kutwi kwaamba ku mpemo, ‘Ndi—Nse kabi limbi kutwi, nkaambo Nseli mpemo,’” na cintucimwi. To, to konzyi kucita ceeco. Wabona, zyoonse zila kkala antoomwe cakweelela a kweenda mbuli mubili omwe mupati.

⁶³ Elyo ta tweede kusola ku kkopela muntu uli oonse. Koba buyo obo mbo bede, wabona, alimwi nje nzila eyo Leza njaka kupanga. To ka libamba mu bupange obo. Elyo, amuyeyeye, mbuli toonse to bakutausi inga twa yanda kubweza busena bwa Billy Graham, ta tukonzyi ku cicita, nanka Billy Graham kubweza busena bwesu. Mwabona, swebo, umwi aumwi ujisi cintucimwi ca kucita. I mulombwana muniini uzibikene okuno unga ndiza ngu sikumamela mayake, mwanakazi muubauba unga ndiza mukaintu wang’anda, mukutausi mupati maningi atala aa nyika sunu ta konzyi kubweza busena bwako. Yebo, Leza waka jisi bukanze muku kupanga obo mbobede, elyo kobelekela Leza mu nzila eyo Nja ka kupanga. Wabona? Elyo Ndi yeeya kuti, ikuti na twa cita buyo eco, mavwili inga ayoenda kabotu loko. Iiyi, inga acita, ikuti na twa cita obo, kutali kusumpulwa. Elyo tu jana kuti, mucibaka ca . . .

⁶⁴ Cindi muntu umwi aambilila muntu umwi cintucimwi, Camagwalo, nkabela twa bona kuti cili luleme, mu cibaka ca—ca kusola kulibombya tobeni, kwaamba buyo kuti, “Ee, lino, Nda—Nda kalubizya. Kondi jatila. Elyo Nseli—Nseli kuyanda. . . Nse—Nse kazi eco, aboobo Ndiyo leka ncobeni kucita ceeco.” Ee, mpawo, mu cibaka ca kucita boobo, ziindi zinji maningi tu cita mbuli Uzia mbwa kacita; wa kalimvwa mbuli kuti wakali mupati loko kuletwa ansi, mwabona, wa kali mwaami. Alimwi ziindi zinji Nda kabona bakutausi munzila eyo, abo bakalimvwa kuti ba kali bayandisi maningi kwaambilwa obo Ijwi mbo lyakabede, Bwini.

“Ee, mazuba aa maleele akainda!”

⁶⁵ Nda konzya kumu tondezya awo Leza mpa kaanza maleele; lino tamu konzyi kundaambila awo Mpa kaalesya. Mwabona? Elyo Wa kaanza zipego; taakwe mpo mwa kabona awo Mpa kazigusya. Mwabona, zili mu Lugwalo. "Kamuya ku inyika yoonse, mu kakambauke Makanimabotu ku bantu boonse." Ciindi cilamfu buti? "Ku inyika yonse, kusikila cilenge acimwi cikaamvwe, mbuli boonse abo bayo amvwa. Ezi zitondezyo ziyo batobela abo basyoma." Mwabona, ta tukonzyi kusintanya cintucimwi cimbi. Amubweze buyo eco Nca kaamba, elyo ciyo lulama a kubeleka kabetu. Pele kufumbwa buyo kuti twa sola kulisalila nzila zyesu zini . . .

⁶⁶ Mpe mpawo Israyeli mpoya ka bambila bulubizi bwayo bupati bwajungwe. Cindi, luzyalo lwaka bapede Musumpululu wa Mulilo, Angelo, cituuzyo, a kuba vuna, kabatumina musinsimi, kabatumina Musumpululu wa Mulilo kukuba tobela, kusololela musinsimi mu nzila. Elyo cindi niba kasika ku, Kulonga cipati ca 19, cindi niba kasintanya luzyalo ku mulao, ba kacita cintu cajungwe maningi nco bakasola kucita. Mwabona? Pele ba kali kuyanda cintucimwi eco nciba kali kukonzya kucita beni.

⁶⁷ Nje nzila eyo mbo tubede. Twe elede kuti katu jisi madigrii aabwiiyi. Nkabela na toli jisi, to konzyi ku njila mu mbungano. Kwa mana. Aboobo, elyo twe elede kulangalanga cintu a kuziba na nca Leza.

⁶⁸ Lino tu jana kuti, Uzia wakalisumpula, elyo wakali kuyo cicita kufumbwa. Wa kakwempa kanunkilizyo a katalika kweenda. Tii ca kabamba lwaandaano lulilonse eco bapaizi ncoba kaamba, wa kali kuyo njila kufumbwa! Elyo cakali kulwana Lugwalo. Ti cakali calugwalo kuli nguwe kucita ceeco.

⁶⁹ Tacili calugwalo kuli nduwe a Ndime ku kkopela muntu uli oonse. Mbubo. Aboobo koba obo mbobede, alimwi koba umwi uli kabotu, alimwi kozulizya bukanze bwako kutegwa bamwi bakubone. Ikuti na uli mukaintu waang'anda, koba umwi wini, wabona. Ikuti na uli ii—ii mulumi, koba wakasimpe, wabona. Elyo ikuti na uli daikona, koba wakasimpe; na mukambausi, kufumbwa mbobede. Pele utasoli kubweza busena bwa muntuumwi umbi.

⁷⁰ Elyo mpawo cindi Ijwi lyakuleta ansi ali ceeći, uta . . . Ikuti na walimvwa kutapatilwa, nkokuti kweempwa. Kwa mana, nku lulama. Eco nce cintu cilikke caku cita.

⁷¹ Pele Uzia ta kayanda kucita booboo. Leza nakamana ku mulongezya nzila Nja kacita, elyo nekubaboobo ta kalimvwa mbuli kuti na cita booboo. Wa kayeeya kuti wakali kuno zumanana, ku cicita kufumbwa, nkaambo wa kalimvwa kuti wa kali kwabilidwe. Pele naka cili mu i . . . Ca kabaanga cakamubamba kulimvwa kunyemena baalumi abo, akwalo, abo ba kali kumwaambila Ijwi lya Mwami.

⁷² Elyo cindi naka cita, waka bindaanina mukati, nekuba, elyo tu jana kuti kumeso akwe kwa kasika cinsenda. Elyo wa kali sicinsenda kusikila na kafwa. Taakwe nakacili kukonzya limbi kuunka ku ng'anda ya Mwami. Wa kafwa, kali sicinsenda. Na kamana kubona janza lya Leza, a obo Leza mbwakali mubotu loko kuli nguwe a zintu Nzya kacita; nekubabobo oyo mwaalumi wa kafwa, sicinsenda, wakali kukkala alikke.

⁷³ Lino tula konzya kucita ceeco. Twa kabona zintu zinji, pele muta yeeyi kuti tuli kwabilidwe loko cakuti Leza inga taabikka lubeta ali ndiswe, mwabona. Mwabona?

⁷⁴ Koyeeya, utasoli kukkopela muntu ulionse umbi. Koba buyo obo mbo bede. Ikuti na Leza waka kubamba kuba wa pentekoste, koba umwi wini, yebo wabona. Ikuti—ikuti na Leza... Utausi nsoni kuli ncico. Nse usi nsoni kuba muntunsi. Nse usi nsoni kuba muna America. Ndi—Nse usi nsoni kuba mukutausi. Nse usi nsoni ku Makanimabotu Nge kambauka. Nkaambo...

⁷⁵ Ndi lizi bunji bwabo bayeeya kuti Nse kkwene mizeezo. Nobaba baama bacembele babotu baluleme, abo bakafwa myaka misyoonto yainda. Cindi Ne katambula Muuya Uusalala lutaanzi, kwakanyina muntu omwe mu cisi cesu wakazi cili coonse kujatikizya Nguwo. Elyo Nda kali mukambausi buyo mukubusyi, muniini, muna Baptisti wakali kutandila myaka ili makumi obilo yakukomena. Pele cindi Ne katambula Muuya Uusalala, baama bakati, "Ulya mulombe ta kkwene mizeezo." Mwabona? Pele tacikwe makani eco baama nco ba kayeeya, Nda kajene Ingale ya muulo mupati. Inga cakalibonya boobo kuli mbabo, pele kuli ndime Wa kali wakasimpe. Mwabona, Mbo wakabede. Wa kali cintucimwi cakasimpe oyo—oyo Ngwe kajana muli Leza.

⁷⁶ Nkaambo, Nda kasyoma lyoonse, mbuli mulombe, kuti eli lyakali Ijwi lya Leza, alimwi Tee lyakali kukonzya kucinca. Jesu wakati, "Majulu a nyika ziyo loba, pele Majwi Aangu taka cinewi. Ta li kalobi." Tamu konzyi kusintanya cintucimwi a Ndilyo. Ni nzila buyo mbo Li lembedwe, elyo nje nzila mbotu Lisyoma. Muta yungizyi cintu, na kutagusya cintu kuli Ndilyo. Nywebo mulizi, omuya mu Bbuku lya Ciybunuzyo, Lyu kati, "Kufumbwa oyo uyo yungizya ijwi, na kugusya cili coonse kuzwa mu Bbuku eli, (inzi?) lutuko luyooba ali nguwe." Aboobo amilibikkie munzila mbo Li bede, a ku Li syoma mbuli boobo, nkabela Leza uyo cizwidilizya.

⁷⁷ Lino wa kaumwa nkaambo ka kuliboteleyza kwakwe loko kwa kulikankaizya. Jisi kulimvwa kuti kwakali... wa kali nguwe alikke wakaliko, alimwi inga nakacita eco ncakali kuyanda alimwi kunyina muntu wakali kukonzya ku mulesya.

⁷⁸ Twa kajisi mukwesu, kutali ciindi cilamfu cainda, oyo Ngwe kausila nsoni. Kalibonya mbuli kuti boonse baka musulaika. Ba katamikizya mukwesu kucita cintucimwi cilubide, eco muteende

nco wa kamutamikizya. Pele Nda—Nda katalika kuyeeya ncico, *kutamikizya* mwaalumi? Nda kamu gwasilizya ncobeni, nkaambo... Nse—Nse kali kuzuminana ncobeni a nguwe. Pele mwaalumi oyo waka lemba caano aku cibikka mu magazini, kuti oyu mwaalumi wa kaamba zintu ezi zyoonse a kucita zintu ezi.

⁷⁹ Elyo busiku bumwi ku muswaangano mu—mu Minneapolis, baka ndaambila kuti sikulemba wa magazini eyi waka liko. Elyo caano caka boola kwiinda mu magazini ya Bunakristo, aboobo Nda... Bwakali bulunguluzi bwa Bunakristo. Aboobo Nda... Ba, ba katondeka mwaalumi, kuli ndime, kati, “Ngo nguwe uukkede *awo*.” Elyo wakali jisi mu caano eci, kuti oyu mukutausi wakalembede cintucimwi, bbuku eelyo mwaalumi ndyata kalemba. Ndi lizi. Ii mulindu wa kalemba bbuku eelyo, alimwi Nda kali muzi mulindu oyo. *Kuluma Kwa Madaimona*.

⁸⁰ Aboobo Nda—Nda kati, “Ee, lino, cintu comwe eco ncenga Nda amba. Lino, inga Nse zuminani a mukutausi, pele Ndi yeeya kuti, ikuti na i—ikuti na ulanganya mutende wa kabeeala aka kalyoonse, ikuti na ta kalanga bulembu bwakwe tacikwe bubotu kwiinda kwaamba kuti oyu mwaalumi wakalemba caano eci, alimwi Ndi lizi ta kacicita, mwabona, mpawo Ndili yoowede loko ku zintu zinji nzya kaamba kujatikizya mukutausi oyu izilubide.” Elyo mpawo Nda kaamba ceeci, “Inga ndayanda kujanwa nkelubide akwalo, kwiinda ku kusola kufutula muntuumwi, kwiinda kusola kusinkila muntumwi oyo uusola kucita muntuumwi kuti afutulwe.” Inzya.

⁸¹ Inga ndasala kubweza busena bwa muntu, aciindi cili coonse, kwiinda kusola kujana butongo a kumwayaula ceeco muntuumwi umbi nca sola kuyaka, nekubakuti ba—ba kapanga bulubizi na kucita cintucimwi cilubide. Aboobo twe elede kolangilila, toongelezya bamwi ali ceeco nco tucita.

⁸² Mpawo cindi oyu mwaalumi nakaumwa cinsenda eci, cindi nakalisumpula mu kulikankaizya, eci cakali ciiyo cipati ku musinsimi oyo muniini. Wa kajana kuti, kwiinda kuli ceeci kuba ciyo cipati kuli nguwe, kuti Leza ula lailila muntu Wakwe ku busena. Mwabona? Muntu takonzyi kulilailila mwini. Leza ngulailila muntu Wakwe. Leza ukupanga obo mbobede. Mwabona? Elyo Leza ulalailila muntu Wakwe, alimwi taelede kusola kubweza busena bwa umwi. Nkabela cakali ciiyo kuli Isaya, kuti taelede kubikka meso aakwe aa bantunsi ku mukozyanyo. We elede kubikka meso aakwe kuli Leza.

⁸³ Lino oyo ndiswe. Kufumbwa muntu, kufumbwa muntu ula konzya kulubizya. Ula konzya kucita bulubizi nkaambo walo muntunsi. Ula konzya kususya milao ya Leza. Alimwi ula konzya ku zintu zinji, nkaambo Saatani ula musunka, alimwi muntunsi buyo. Elyo ikuti na Leza wakasola kunantula maanza Aakwe, na kawa. Kwa mana.

Elyo Nda kamvwa bantu kabaamba, “Oh, Saatani takonzyi kucita ceeco.”

⁸⁴ Iiyi, kolekela buyo Leza anantule janza Lyakwe ciindi comwe, a kulangilila ceeco cicitika. Nku ii... Nda kombelezya cakumaninina, “Leza, ta mutumi. Kondi fwida luse. Komu tantamuna kuli ndime,” nywebo mwabona. Ndi—Ndi yandikana luse lwa Leza. Elyo toonse tu yandikana ndulo.

⁸⁵ Lino tu jana kuti, Isaya, waka yeeme maningi ku janza bbotu lya mwaami, elyo lino janza lya kagusigwa kuli nguwe; nkabelia mwaami wakali fwide, a kufwa ku cinsenda, mu mause. Lino, Isaya, kuciindi eci, mwaami mu kulisumpula, ee, mpawo mwana wakwe muniini wakali sikutola busena. Elyo tu jana kuti—kuti bantu bakanjide mu ii—ii ciimo cakulilemeka kuyoosya.

⁸⁶ Cindi nokutakwe musololi wini munaleza, mpawo bantu batalika kunjila mu kutalilemeka kabotu. Ndi yeeya kuti elyo ndepenzi kuli ndiswe sunu, mu cisi cesu, mu mambungano esu, a zintu. Tu yandikana basololi banaleza, muntuumwi oyo utonkomeka mukozyanyo.

⁸⁷ Elyo, pele Wa kalekela Isaya kuziba awa kuti ta kali kuyandika kulangilila ku bantu. Aboobo Isaya, buzuba bumwi, mbuli mbwa kali kuya kwiingaila koonse, kweelede kuti waka katala kumaninina, mukuziba kuti wa kajisi mulimo mupati, wa kaselemukila mu tempele kuyo paila. Lino eco ncintu cibotu kucita, kuli ndiswe toonse. Kaselemukila ku tempele kuyo paila.

⁸⁸ Elyo tula bona cindi nakali ku paila kunselelo aa cipaililo. Mpoonya buyo, mukuba musinsimi, wa kanjila mu cilengaano. Elyo, cindi naka cita, wa kalanga mujulu a kubona Leza, Mwaami, kakkede aatala loko, kasumpwidwe, atala lya cuuno Cakwe cabwami, elyo malongwe Akwe akazuzya busena, nywebo mwabona. Mpawo wa kabona mukozyanyo wini. Wa kabona Umwi omo mwakali kukonzya kubikka kaanzambwene kakwe, oyo watakali kukonzya kuumwa ku cinsenda, Umwi watakali kukakilwa. Mu majwi amwi, Wa kali kwaambilisa Isaya, “Bona, ubikka bulangizi bwako mu muntu umwi, nkabela caka kakilwa. Ka bikka kako... kalanga ku muntu oyu mbuli mukozyanyo, elyo—elyo wa kakacilwa. Lino langa kujulu Awa, kuli Ndime, Ndime Leza utakakilwi.”

⁸⁹ Elyo Ndi—Ndi yeeya kuti eco nco twe elede kucita mazuba ano, mbuli balanda Bakwe, beeleda kulanga kuli Nguwe. Jesu mukozyanyo wesu. Elyo twe elede kulanga kuli Nguwe, Musolozia Sikulomya lusyomo lwesu.

⁹⁰ Lino tu jana kuti, mu cilengaano eci, kuti wa kabona Leza kasumpukide mujulu aa cuuno cabwami. Mpawo wa kaziba cintu cimbi. Mubone, kuzunguluka Nguwe kwakali, a mu tempele omo Mwa kabede, kwakali ba Serafimu aba Bakujulu.

⁹¹ Ikuti na inga mwalingula biyo elyo bbala, Ndi yeeya kuti lyaka belesegwa buyo ciindi comwe na zyobilo mu Bbaibbele.

Alimwi ta—ta bali iba Kkerabbimu, pele litandila ku ba Kkerabbimu. Cintucimwi mbuli Cilenge Caangelo; nkabela nekubabooobo tali Angelo, alimwi ngu Angelo, pele Muntu musalesale. Obo Mbo babede, Mba sikuumpa zituuzyo, mu Bbaibbele. Alimwi awo cituuzyo, mubwini, kuleta na kusololela mu i... kupangila nzila kuli sizibi, ku busalali. Elyo ba Serafimu aba baumpa cituuzyo eco cakali kuyandikana, Ba—Ba kaunka ku i... Oyo wa kali mulimo Wabo.

⁹² Elyo mbaaba Mbo bakabede, kuuluka moonse mu tempele kuciindi Isaya nakali mu cilengaano, nkabela tempele mbulizulwa lyakazula busi. Elyo Ba kali koongolola, Umwi kuli Uumbi, “Uusalala, uusalala, uusalala, walo Mwami Leza Singuzuzyonse! Uusalala, uusalala, uusalala!” Oh, mu majwi amwi, “Kuli Cintucimwi eco citakonzyi kuwa. Ngooyo mukozyanyo wanu. Ngooyo Mwaami wa kulangako. Uusalala, uusalala, uusalala, walo Mwami Leza Singuzuzyonse!”

⁹³ Elyo lino tu jana kuti ezi zyakali zilenge zya mababa ali cisambomwe. Elyo lino tuyu langalanga kaambo kakuba aa mababa ali cisambomwe. Ngo baka jisi, tu jana kuti, Ba ka jisi obilo kumeso Abo, obilo ku matende Abo, nkabela bakali kuulusya mababa obilo.

⁹⁴ Lino amubone, lutaanzi, kuti ezi zilenge zyakali kukutauka mu Busyu bwa Leza. Alimwi oyo wa kali mulimo Wabo, kali koongolola, “Uusalala, uusalala, uusalala, walo Mwami Leza Singuzuzyonse!” Alimwi Ba kali koongolola, sikati a masiku, mu Busyu Bwakwe, kuciindi cituuzyo kacibikkidwe awo. “Uusalala, uusalala, uusalala, walo Mwami Leza Singuzuzyonse!”

⁹⁵ Elyo Ndi yanda kuti mubone cintucimwi awa, a kuyeeya. Abo ba Serafimu ba ka jisi mababa obilo ku masyu Abo. Nkaambonzi Nco ba kaabikka ku masyu Abo? Nkaambo Ba kali mu Busyu bwa Leza. Elyo amuyeeye buyo, ikuti na Baangelo basalala bakacita kuvumba kumeso Abo, mu Busyu Bwakwe, ino kujatikizya ndiswe? Kajisi mababa ku masyu Abo, cakaiminina lulemeko.

⁹⁶ Pele, sunu, tu jana kuti kunyina lulemeko. Nciyumu kuti ujane lulemeko. Ta ba jisi bulemu kuli Leza. Ba laima a kwiimba *Leza Longezya America*, atende lyabo aa mungwala. Elyo ncibyaabi, nzila mbo bacita.

⁹⁷ Nda unkide kuyo lomba sandiwichi, sunu, mu—mu busena. Elyo mulindu muubauba, kuta bandika zya nguwe, pele Ndali kuyeeya kuti waali kufwa. Waali kulibonya mbuli kuti waa jisi zilonda kunsi lya meso aakwe, waa jisi bbulu koonse ali nguwe. Elyo—elyo wazuzila atala, kata samide zisani kumaninina, elyo waa amba, “Ino uyolya nzi?”

⁹⁸ Nda ti, “Sa inga wandi letela sandiwichi a ii—ii—ii—ii—ii tambula ya maanzi aamukupa?”

Elyo waa ti, “Whiski” aa cintucimwi, musyobo umwi.

⁹⁹ Nda ti, “Peepe, baama. Wa impya ku ndimvwisya.” Nda ti, “Nda ti, ‘maanzi aamukupa.’”

Elyo waa ti, “Oh,” wati, “sa to yandi kuba a cintucimwi ca kunywa?”

Nda ti, “Ndi yanda maanzi aamukupa.”

¹⁰⁰ Elyo waa ti, “Ee, yebo koonse, sa to yandi... Masiku tu kutauka *ceeci a ceeci*.”

Nda ti, “Ndili mukutausi.”

¹⁰¹ Waa ti, “Ee, besu... Ee, bapaizi besu ba Katolika bala njila omuno a kunywa.”

¹⁰² Nda ti, “Ndi—Nseli mupaizi wa Katolika, mulindu. Ndi—Ndi yanda... Ndi yanda tambula ya maanzi aamukupa.” Cakali bonya mbuli kuti caka gambya mwanakazi. Ta azi kuti mbo cibede. Mwabona?

¹⁰³ Elyo inyika yakanjila mu busena buli boobo. Lino ikuti na mupaizi ula njila a kunywa, mbunga ili jisi nguzu zya kunywa; ngooyo mukozyanyo wanu, mwabona. Oh, ma, ino mbubi mo tuponamo! Tu yandikana kusalazya kwa ng’anda, nzila yoonse kuzwa ku cikambaukilo kusika ku i... Inzya. Iiyi, munene, tula cita ncobeni. Obo kusofwaala kwa inyika!

¹⁰⁴ Elyo aba, kunyina lulemeko, kunyina bulemu! I bantu sunu, taba lemeki Leza. Ta ba jisi lulemeko. Ba bweza Zina Lyakwe mubuyo, a kwaamba kudana kwatombe. Elyo—elyo abalo bakutausi bala cita obo. Nywebo mula mvwa ii—ii kudana, Ndi yeeyela kuti inga caba kabotu. Pele bakutausi beelede kuba mikozyanyo, Ndi yeeya, zya—zya bululami a busalali. Elyo ako nkekaambo Nce yeeya kuti ambweni ta—ta tusakani maningi kwiinda mbo tucita; tatu citi, tatusiki boobu, lusinizyo olo ndo tweelede kuba andulo muli ncico. Cindi nomu lilemeka bumwi, a kuyakuya, mula sweekelwa nseke eyo niini ya lusinizyo, nywebo mulizi. Kuli cintucimwi kujatikizya njiyo.

¹⁰⁵ Mweelede kuyeyea kuti Leza ula mulangilila, oora lyoonse. Ula mulangilila cindi nomoona. Lino, Ndi yeeya kuti kaambo bantu nco ba citila zintu ezyo nkaambo kakuti, ba—ba—ba, taba tweluki ku Busyu Bwakwe, mwabona. Pele nekubaboobo Mpali, nekubakuti muyeyea kuti Mpali na pe. Ula bona kulanga koonse nko panga, a kweenda koonse—koonse nko panga. Uli zyi koonse kwa nkuko. Pele twe elede kumvwisya obo.

¹⁰⁶ Twa kali kunga tu jisi kaimbo kaniini, cindi Ne kasika lutaanzi akati ka ba Pentekoste, nkoba kali kwiimba.

Kweenda mugwagwa kuyaku makkalilo eeni
aa buntu,
Kuli Liso likulangilila;
Ntaamu yoonse eyo njo bweza, eli Liso pati
lilalanga,
Kuli Liso likulangilila.

Mwabona? Sa mula kayeeya kaimbo? [Mbunga yaamba, “Iyi.”—Mul.] Lino obo mbwini.

¹⁰⁷ Kubakoonse kwa Leza kulizi nco mucita, alimwi neiba miyeeyo yanu. Ciindi cimwi Ne kali mu cilengaano, Nda kali kukanana ku Cilenge cakaimvvi munsi lyangu; elyo Wa kavwiila, Wa kati, “Miyeeyo yako ila limvwisya loko mu Majulu kwiinda jwi lyako mboli bede aa nyika.” Uli zyi eco ncomu yeeya. Inga mwaamba kuti mu—mu cita *ceeci* alimwi mucita *ceeco*, *a ncico*, pele, nywebo mwabona, kunsi kwa moyo wanu, ikuti na tuyeeya bwaandeeene, muli—muli mukucita cintucimwi cilubide. Mwe elede buyo kuba obo mbo mubede, mwabona, i—i moyo. I mulomo weelede kwaamba ceeco cili mu moyo. Mwabona? Elyo aboobo tu jana kuti bantu taba mvwisyi i—i Busyu bwa Leza.

¹⁰⁸ Nywebo mulizi, beeledge kuba mbuli Davida, muntu wakali kuyandwa ku moyo Wini wa Leza. Wa kati, “I Mwami lyoonse uli kumbele lyangu.” Kufumbwa oko nkwaunka, ulayeeya kuti Leza lyoonse uli kumbele lyakwe. “Uli ku janza lyangu lya lulyo, elyo Nse kazunganisigwi,” nkaambo Leza uli ku janza lyakwe lya lulyo.

¹⁰⁹ Lulemeko! Twe elede kulemya umwi aumwi, kulemekana umwi aumwi, mbuli mukwesu, mucizi. A kuyandana umwi aumwi, kubelesya luyandisyo lutafwi. Yebo watii, “Ee, Nse konzyi buyo.” Ee, kokkala buyo *ano* kaindi kaniini kambi, elyo mpawo uyo bayanda bantu, ayebo. Uyo bayandisyia abo bata kuyandi. Eco ncobeni nce citondezyo cibotu ca Bunakristo: cindi wakonzya, kuzwa mu moyo wako, kuyanda baabo batakuyandi. Kuyanda batakwe buyande.

¹¹⁰ Jesu wakati, “Ikuti na mucita buyo bubotu kuli baabo ba mucitila bubotu, ee, basimitelo bala cita cintu nciconya.” Pele, mwabona, mwheeledge kuba basiluse kuli baabo batakwe luse kuli ndinywe. Amucite zibotu kuli baabo bayo mucitila bubi. Lyoonse kamuyeeya eco. Amu cibambe eco kumbele lyanu, kuti Leza ula mulangilila. Amuyeeye, Leza wakali sibuya kuli ndinywe cindi nimwakali babi kuli Nguwe. “Cindi nimwaka cili basizibi, Kristo wa ka mufwida.”

¹¹¹ Lino tu jana, kuti, aya mababa kumeso Abo akaliko nkaambo Ba kali mu Busyu bwa Leza, calulemeko. Elyo ikuti na Serafimu uusalala wakali kuvumba busyu Bwakwe kunze lya civumbyo cisalesale, Umwi oyo utazi cibi pe, tana bisizye, pele nekubaboobo mu Busyu bwa Leza Uusalala waka cita kusisa kumeso Kwakwe kusalala mu Busyu bwa Leza, ino ncinzi sikuupaupa ncayo cita mu Buzuba obo? Ino ncinzi oyo uuwide ncayo cita mu Buzuba obo? Ino ncinzi oyo utalimunaleza ncayo cita mu Buzuba obo, cindi mwa kuboola? Elyo muyo elela ku Mu langanya.

¹¹² Kuli biyo cintu comwe. Yebo wati, “Pele Ta ka ndipangila mababa a kuvumbya kumeso kwangu.” Pele Wa katila Bulowa bwa Mwana Wakwe Mwini, kuti ukonzye kuvumbya kumeso ako. Mbo mbubo. Nce cilivumbyo Cakwe cilikke eco Nca jisi ku mukowa wabantu, bwalo Mbulowa bwa Jesu Kristo.

¹¹³ Lino, cabili, Ba kajisi matende Abo aavumbidwe a mababa, kunsi lya matende abo. Lino eco cakali kwiiiminina bubombe. Oh, ndeelyo bbala lisweekede sunu, ku bantu banji. Bubombe mu Busyu Bwakwe. Kulibombya lwesu mu Busyu Bwakwe.

¹¹⁴ Nda kabona Muuya Uusalala kaunjila mu kaanda a—a kukutauka a kucita mbubonya zintu ezyo Bbaibbele nzolya kaamba kuti Uyo cita, kutweluka, alimwi Nda ka bona bantu kabanyamuka a kuzwida anze. Nda kabona bantu kabakkala a kwaambaula, a kuseka a Ku ufubaazya, kuciindi nowakali kukutauka.

¹¹⁵ Ndila yeeya busiku bumwi, mukutausi waka leta bali makumi obilo alusele ba mbunga yakwe, elyo bakali kkede. Oku kwakali ku Jonesboro, Arkansas.

¹¹⁶ Elyo ba kajisi mulombe wakasuntu, wa ka jisi kasuntu. Elyo oyo ngu dyabulosi. Ngu dyabulosi. Obo mbo cibede. Taba citi, madokotela tabazi cici citya. Ngu—ngu dyabulosi. Elyo babikka ii...kajisi peegesi antoomwe ii—ii—ii kasila kazambaidwe kuli nkako; cindi naka jisi kusuntuka oku, ba kali kunga ba kasowela mu mulomo wa mulombe oyu, nkaambo wakali kunga uunyeela mulaka wakwe obu. Elyo baka muleta mulombe atala, elyo—elyo wakali kugwigwima mpoonya aa cibumbili. Mubwini, ciindi anjila mukunyongana kuniini, ala njila muli kumwi. Aboobo cindi nitwaka cili kulibambilila ku kombela mulombe, Nda kati, “Sa boonse inga bakotamika mitwe yabo mu lulemeko?” Elyo Nda—Nda ka mu kombela, elyo i—i muuya tee wa kamusiya mulombe.

¹¹⁷ Elyo Nda kalanga koonse, nkabela Nda kabona kakamu kaniini kakakkede mu busena. Nda kati, “Sena inga mwakotamika mitwe yanu?” Nda kati, “Mwe elede kuswiilila.” Nda kati, “Oko kwakali kutumwa, ‘Ikuti wa citya bantu ku kusyoma, elyo mpawo ko sinizya cindi wa komba.’” Nda kati, “Sa inga mwakotamika mitwe yanu?” Oyo mulombwana waka ndiseka buyo.

¹¹⁸ Elyo aboobo Nda kavuuluka, pele, oyu, tiwa kamusiya mulombe. Elyo lino aba bakali myaanda ya bantu, ziindi zyosanwe kwiinda zya baaba ba kkede omuno sunumasiku, baka kkede okuya, iifyi, ziindi zinji. Ba ka taminina kuti kwakali bantu bali zyuulu zili makumi obilo alusele okuya. Aboobo—aboobo kwa kali—kwa kali, kwa kali boonse...

¹¹⁹ Elyo mpawo Nda kati, “Inga—Inga tee ndacita ceeco, munene.” Elyo wa kali kuzulilwa ku ii—ii mbungano ya

kabungwe ako kakali kuseka buyo kuponesegwa kwa Buleza, takasyomi kuti kuli cintu mbuli ceeco.

¹²⁰ Aboobo Nda kalanga koonse. Oyo mulombe utakweankwaya, kameneno kakwe anze. Elyo banyina kusoleka koongolola, balo kabalila mbuli booboo. Elyo mulombe kasoleka kumena, a kuyabuya.

¹²¹ Nda kati, “Taata Wakujulu, talekeli mulombe oyu utakwe kaambo kweelela kupengela nkamu ilya ila mulandu, mwabona.” Nda kati, “Elyo lyakali Ijwi Lyako—Lyako, nkabela Nda—Nda kasyomeka aku baambila. Elyo banji basikasuntu baponesegwa okuno ku muswaangano.” Nda kati, “Ta lekeli mulombe oyu utakwe kaambo kuti apenge. I banyina a bawisi bamuleta okuno. Nda kombela luse.”

¹²² Mpawo Nda kavuuluka, Nda kati, “Mu Zina ly a Mwami Jesu, kwiinda ku lusyomo, kwiinda kukutumwa kwangu kwakapegwa kuli ndime kuzwa kuli Leza Singuzuzyonse, oyu dyabulosi takonzyi kujatilila mulombe oyu. Ula angulukide, mwabona. Ikuti na basikutasiilila bakabe basikutasiilila, mpawo ula angulukide kuunka kuli mbabo, pele kozwa mu mulombe oyo.”

¹²³ Elyo Nda kabona bantu bali makumi obilo alusele, a mweembeli wabo, kuvida mu kasuntu, mpoonya kuzunguluka a kuzunguluka, a kuzunguluka a kuzunguluka, aa cibuye mbuli booboo. Elyo kuciimo Mbwe ndizi, ba cika jisi, mwabona.

¹²⁴ Lino, nywebo mwabona, tamweede kuba basikunyansya pe. Mweede kulibombya nobeni. Mbangaye banu bakaliko mu miswaangano a kabona zintu zikozyenye kazi citika mu miswaangano yangu? Buyo, baa, mwabona. Masimpe. Iiyi, munene.

¹²⁵ Ciindi cimwi ba kaleta mwaalumi kuti bandibibe. Nda yeeyela bunji bwanu mula ciyeeya eco. Elyo ba—ba kali kunga bamutola ku zilao zya basikalumamba, a—a kubweza basikalumamba aba akubabiba, kuba citya kukuwa mbuli mubwa. Elyo ba kali kuyanda kuba a cisesyo kuli ndime. Aboobo Nda kali mu auditoriamu, nkabela ba kaleta mwaalumi oyu. Elyo—elyo Nda kamvwa, cindi mundando wa mipailo niwa katalika, kwakali muuya mubi kubusena bumwi.

¹²⁶ Ula konzya lyoonse kwiiziba a badonaika. Ba yeeya kuti taba citi. Mbu cakabede. Ula konzya kuumvwa. Ula andeene.

¹²⁷ Aboobo mpawo Nda kali kukonzya kuziba awo mpuwa kabede, pele Nse kakonzya buyo kubona busena oyo mwaalumi mpa kabede. Nikwakainda kaindi, Nda ka ujana alimwi Nda kaubona obo mbo wakabede. Nda kalangilila cimvule eco cakali kulengelela ali nguwe. Elyo Nse kayanda kwaamba ceeco, pele ndaka muvuulukila buyo, kati, “Omwana wa dyabulosi,” mwabona, “nkaambo nza dyabulosi nca bikkila muzeezo wako ku cita ceeco? Nkaambo wacita ceeco,” Cintucimwi cakali ku

caamba muli ndime, “bayo kuyola kuzwa awa.” Nkabela uci lebukide. Mwabona?

Lugwalo kutobel a lugwalo, “Kaboola kuli nguwe!”

¹²⁸ Nda kati, “I cintu biyo Nce zyi, nkweempwa. Mwabona, tee Nda cita ceeco. Oko kwali kubula bulemu kwako kumbele lya Leza.” Mwabona? Lino muta citi ceeco. Tuli . . .

¹²⁹ Twa sika ku ziindi bantu nobayeeya kuti obu busalali kumbele lya Leza musyobo umwi buyo wa kucapa, na musyobo wa ii—ii cikama ca bantu abo batazi, musyobo umwi wa basinguuzu zu na mukowa, na cintucimwi. Pele andi kusyomezye mukasimpe, mukwesu! Inga kakuli kucapa kunji. Nse—Nse ambi kuti takukwe; Nse—Nse—Nse konzyi kwaamba boobo. Ndili muntu buyo. Nse elede kubeteka. Nde elede buyo kukambauka. Pele kuli Muuya Uusalala wini, Nguzu zini zya buapostolo zya Muuya Uusalala. Amu masi akumbi, a bang’anga a zintu zila buka, alo madaimona, kuzundikizya. Oh, ikuti nitwa buyo. . . . Inga ndalesya ciyo cangu awa, kunjila ku mwaambila kujatikizya zintu ezyo. Elyo ninzi? I Muuya Uusalala, taakwe ciindi comwe ni Nda ka Ubwene kukakilwa kucicita. Uyo cicita ciindi coonse.

¹³⁰ Amubone lino, ba kabikka, kajisi mababa ku matende abo aa bubombe. Ta tuyandi kulikotamika tobeni. Tu yanda kuyeeya kuti tuli muntuumwi.

¹³¹ Ndila yeeya okuno kutali ciindi cilamfu cainda, Nda kali mu miziyamu imwi niini, elyo—elyo ba kajisi i—i kulangalanga kwa muntu uulema mapaudia ali mwaanda a makumi osanwe, obo mubili wakwe mbo wakali kudula mu makkemikko. Ndi syoma kuti akali maseenti aa makumi ali lusele aone, muntu uulema mapaudia ali mwaanda a makumi osanwe, makkemikko aakwe—aakwe aa mubili wakwe. Wa kajisi kaushiamu, a ii—ii citubatuba kunji ambweni kusansaila citeente ca nkukunseke, a zimwi zimbi. Nkukoonse oko buyo nkwa—nkwa kajisi muli nguwe, kulema mapaudia aa mwaanda a makumi ali lusele aone. . . . na Nda amba maseenti ali makumi ali lusele aone, kulema mapaudia ali mwaanda a makumi osanwe.

¹³² Kwakali baalumi bakabusyi bobilo ba kaimvwi awo, kabalanga ali ceeci. Elyo Nda kaliiywi nkoonya kusule lyabo, mbuli umwi wabo nakati, “Ee,” kati, “John, akwalo ta tuduli maningi akwalo, tula cita na?” Elyo wa kati, “Nda yeeyela tatuli obo.”

¹³³ Elyo Nda kati, “Ee, balombe, obo mbwini, mwabona, ta tuduli maningi mu makkemikko. Pele mujisi buntu mukati lyanu, mwabona, obo budula kutola manyika ali milioni, mwabona.” Mbo mbubo. Mwabona?

¹³⁴ Pele nekubaboo tu—tu yanda kumamela, tu bikka kulisumpula muli mu bbaki eli lya cikutu caboya ilya maseenti ali makumi aali lusele aone, kulivumba mu madollar ili myaanda

yosanwe, a—a kulungumika mpemo zyesu mujulu, a kuyeeya kuti tuli—tuli mukucita cintucimwi. Nsyu ambi kudana. Oku takuli ikudana. Oku, oku nku mwaambila buyo obo mbo tubede. Mwabona, tuli—tuli—tuli . . .

¹³⁵ Ta tujisi bubombe. Ta tuyandi, a bantu taba citi. Wa unka ciindicimwi ku bantu basamide kabotu ncobeni mu mbungano, ba—bayo njila; elyo ikuti na tosamide buyo kabotu, bayo kulanga a kwaambaula, nywebo mulizi. Elyo kupanga kwa . . . Ta beelede kucita boobo, alimwi kabataminina Bunakristo. Ndi—Ndi—Ndi yeeya kuti nkulibanda buyo kutali lukono. Nkaambo Ndi syoma kuti ii—ii luzibo lwini lwakaindi antoomwe a Leza luyo panga bbaki lya tukisido a kubukata maboko akwe aa ovolosi, a kuti, “mukwesu.” Nda—Nda cisyoma ncobeni. Nca bwini. Ii dresi lya mulembo wa kkaliko a imwi ntali ya siluki, uyo mwiita kuti, “mucizi.” Iiyi, munene. Nkaambo, tazili zisani, tali muntu. Ngu Kristo, oyo uuli mukati, nkabela twe elede kulibombya tobeni.

¹³⁶ Lino tu jana kuti, nku, aba Baangelo bakavumba matende Abo, na ba Serafimu aba.

¹³⁷ Musa, cindi nakali mu Busyu bwa Leza, oyo, amu mulangilile kwiinda ku Musumpululu wa Mulilo oyo wakali kaindi oko mu citeo eco ciyaka mulilo, Mwami waka kanana. Elyo aumwi ulizi kuti oyo Musumpululu wa Mulilo wakali Kristo, Wa kali Angelo wa Cizuminano. “Musa wakasiya Egepita, wakalanganya masampu aa Kristo kuba lukono lupati kwiinda ezyo zya mu Egepita.” Aboobo, Wa kali Angelo wa Cizuminano. Elyo cindi Na ka libonya omo mu citeo ciyaka mulilo ku lubazu, baa, kunembo lya Musa, elyo Jwi lya kat, “Samununa nsangu zyako.” Matende ako, mwabona. “Samununa nsangu zyako, nkambo aabusena mpo imvwi alasalala.” Musa wakalibombya mwini, kwiinda ku kusamununa nsangu zyakwe.

¹³⁸ Oyo Musumpululu wa Mulilo nguwenya waka libonya kuli Paulo mu lweendo lwaku Damasiko, buzuba bumwi.

¹³⁹ Nywebo mula yeeya, Jesu, cindi Na kali mu nyika . . . Ba kat, buzuba bumwi ba kaamba kuti kwakali . . . Mu Musalali Johane 6, ba kali kunywa kuzwa ku kasensa, a kukkomana. Elyo Wa kat, “Mebo, Ndili Meenda ayo azwa mu Mwaala oyo. Ndili Cinkwa ca Buumi eco cizwa ku Julu,” nywebo mwabona, mbuli boobo.

¹⁴⁰ Tiiba kakonzya ku cisyoma. Ba kat, “Baa, okuno! Tu lizi kuteeti Ujisi daimona, alimwi Uli sondokede,” caamba kutakkwana. “Nkaambo, To indilili ku myaka ili makumi osanwe yakukomena, nkabela Wa amba kuti Wa ka bona Abrahamu?”

Wa kat, “Katanaba Abrahamu, NDIME. Inzya, NDIME.”

¹⁴¹ Lino tula bona obo, kuti Jesu wakati, “Ndi zwa kuli Leza. Ndi inka kuli Leza.” Cindi oyu Musumpululu wa Mulilo niwa kaba mibili wabantu, Leza kaboola kuzwa ku Ciimo cataata, [Kabeela katakwcintu aa teepu—Mul.] . . . Ciimocabwana, elyo

cindi Na kaboola mu bube obu. I bube botatwe; Taata, Mwana, a Muuya Uusalala. Cindi Leza naka yubululwa mu mibili wabuntu, Wa kati, “Ndi zwa kuli Leza. Alimwi Ndi inka kuli Leza,” nkabela Wa katanta kujulu.

¹⁴² Elyo—elyo Saulo waku Tarso, mu lweendo lwakwe kuselemukila ku Damasiko, wa kauminwa ansi ku Mumuni. Elyo cindi na kacita, wa kalanga mujulu. Elyo oyo mu Juda nata kaita cintu ciliconse kuti, “Mwami” ikuti na Tii wakali oyo Musumpululu wa Mulilo. Wa kabona Mumuni oyo okuya, nkabela wa kati, “Mwami, Ino Ndu weni?”

Wa kati, “Saulo, nciyumu kuli nduwe kusansa cibinzyo.”

Elyo wa kati, “Ino Ndu weni, Mwami?”

Wa kati, “Ndime Jesu.” Mwabona, Musumpululu wa Mulilo alubo.

¹⁴³ Amulange kuli Saulo, wakalibombya mwini mu tombe, mwabona, mu Busyu bwa Leza. Bubombe! Kauminwa ku matende aakwe, kalede kasaleme ambweni, kalangide mujulu.

¹⁴⁴ Elyo oyo Musumpululu wa Mulilo ka weendeenda awo, wa kabona a kuziba. Mboli mwiyi kuzwa kunsi lya Gamalieli, a mwiyi mupati wa buzuba obo, wa kalizi kuti Leza wakasololela bantu Bakwe mu ciimo ca Musumpululu wa Mulilo. Elyo oyo Mulilo, Musumpululu wa Mulilo, kabambwa kuba mibili wabuntu akukkala akati kabo, alimwi wakabambulwa nkambo ka zibi zyabo, “elyo Ndi zwa kuli Leza; a kujokela kuli Leza,” nkabela ngooyu Mbwa kabede, kucili mu Zina lya Mwami Jesu.

¹⁴⁵ Elyo mpawo tula jana mpawo muli ceeco, kumane kakutanaba buyo ceeco, Johane Mubapatizi, mupati kwiinda wa basinsimi boonse. Basinsimi boonse bakaamba zya kuboola Kwakwe; Johane wakati, “Oyu ngo Nguwe.” Walo, walo waka Mu zibya ku inyika. Nkabela Johane kaimvwi omuya mu meenda, cindi nakali kubapatizya, elyo wa—wa kali kwaamba, “Kuyo boola ciindi elyo cituuzyo cabuzuba abuzuba no ciyo gusigwa mu tempele, nkabela kuyooba Muntu uyoooba cituuzyo.” Elyo Johane wakali masimpe kuti uyo bona Mesiya.

¹⁴⁶ Nywebo mwabona, cindi Johane nakaitwa, bawisi bakali bapaizi. Pele kanjikanji mulombe wakali kucilila, mu mazuba ayo, alimwi bacicita Bakujwe asunu, incito ya bawisi. Elyo mboli lyonse nakaba mupaizi. Pele Johane kunyina nakaunka ku cikolo. Nkaambo, Johane wakazyalwa, kuzwa mwida lya banyina, “kazwide Muuya Uusalala.”

¹⁴⁷ Cindi, Elisabeti nakamita elyo muvwanda wakali fwide mwida lyakwe. Cindi Maria nakaswaigwa kuli Angelo, Gabrieli, aku mwaambila kuti mweeninyina Elisabeti, oyo watakacili kukonzya kuzyala, kuti inga uyomita awalo. Elyo mpawo Maria wakazuzila kuyo muswaana. Elyo waa kalisisa mwini, nkabela waa kalibilika nkaambo muvwanda takali kuputa kwa myeezi

ili cisambomwe, elyo eco nkasowe. Elyo aboobo waa kabona Maria kazabuza, waa kazuzila aanze a kuyo muswaana, aku mugwambatila. Elyo waa kati, katalika kwaambaula. Elyo—elyo waa kati, “Ndi lizi kuti uyooba mutumbu.” Waa kati, “Iiyi, elyo Ndi—Ndi yooba mutumbu, ambebo.”

“Oh, Nda yeeyela yebo a Josefa muli kwetene.”

“Peepe, peepe. Ta tuna kwatana pe.”

“Elyo uyooba mutumbu?”

¹⁴⁸ “Inzya. I Muuya Uusalala waka ndivunikila, a kwaamba kuti Cintu eco Cisalala ciyo zyalwa kuli ndime, muli ndime, uyooba Mwana wa Leza, alimwi Nde elede kuyo mwiita Zina Lyakwe kuti ‘Jesu.’”

¹⁴⁹ Elyo mpoonya buyo Ijwi eelyo “Jesu” mbu lya kaambilwa ciindi citaanzi kuzwa ku milomo ya muntunsi, muvwanda oyo wata kajisi buumi muli nguwe, mubwini, katambula buumi mwida lya banyina a katalika kusotauka cakukondwa. Elyo ikuti na Zina lya “Jesu Kristo” liyo leta buumi ku muvwanda uufwide, ino ncinzi nco Lye elede kucita ku mbungano yakazyalululwa lubo eyo itaminina kuti izwide Muuya Uusalala? Mwabona?

¹⁵⁰ Lino ino musyobo nzi wa mulombe oyu mbwa keelede kuba? Wa kali kweelede kwaambilizya Mesiya uboola. Malaki 3 yakati uyo cita. “Amubone, Nda tuma mutumwa Wangu kumbele lya busyu Bwangu.”

¹⁵¹ Lino, ikuti na kaunka kunselelo ku seminari, bamwi bakutausi abo okuya, kati, “Lino, Johane, uyo aambilizya Mesiya, baa, uli—uli zyi ulya Aisha Joe okuno, na—na—na Taata Jim, na bamwi babo, yebo ulizi kuti uli jisi i—i—i—i zyeelelo zyoonse zya kuba Mesiya, ngo nguwe, Johane,” kuti—kuti... mwabona, naka ongelezegwa ku muntu.

¹⁵² Wa kaunka mu nkanda, elyo wa kakkala a Leza. Eyo nje seminari mbotu maningi Nje ndizi. Nkaambo, mulimo wakwe wakali mupati maningi ku bantu bamwi kuno mwaambila, a ku mutola ku makani malemuaabuleya. Mwabona, wa kajisi ii—ii mulimo, wa kabambilwa cintucimwi. Elyo Johane wakalizi kuti cindiaku yutuka, kakambauka, kuti Mesiya wakali aa nyika mpawo.

¹⁵³ Mboli buyo masimpe abo baalumi basongo mbu bakazi, cindi niba kalanga ansi kuzwa ku Babuloni a kubona nyenyezi ezyo zyotatwe mu mundando, eco cakali citondezyo cakuti Mesiya wakali aa nyika kale. Nkekaambo nco bakali koongolola, “Nkokuli Nkwa kazyalilwa, Mwaami wa ba Juda?” Elyo mbungano tee yaka jisi bwiiinguzi. Ta ba bujisi asunu. I Bbaibbele ndeli bujisi. Ijwi lya Leza ndeli bujisi. Mbo mbubo.

¹⁵⁴ Tu jana kuti, muli zyoonse, kuti Johane wakacita kwaambilizya Mesiya. Elyo wa ka...Wa kali kukonzya buyo kuziba Mesiya oyo kwiinda ku citondezyo. Nje nzila mbwa

kaziba Mesiya. Eyo nje nzila ilikke Leza njalizibya Mwini lyoonse; kwiinda ku citondezyo ca Malembe. Elyo wa kalangilila. Wa kaima anze awo, wa kati . . .

Ba kati, "Sa nduwe Mesiya?"

¹⁵⁵ Wa kati, "Peepe. Nse eleli akwalo ku guma nsangu Zyakwe." Wa kati, "Pele Ngu Umwi . . . Nkwali Umwi wiimvwii akati kanu."

¹⁵⁶ Oh, ma, muta yeeyi kuti Nda nyongana! Ndi lizi awo Mpe bede. Peepe, pele cilimvwisya kabotu cindi Nda talika kuyeyya kujatikizya ceeco, mwabona, "nkwali Umwi akati kanu." Nkabela Nda caamba eco sunumasiku. Nkwali Umwi akati kanu, Muuya Uusalala mulemu waka syomezegwa kutilwa ku buzuba bwa kumamanino. Nda bona citondezyo Cakwe cakuzumanana, elyo Ndi lizi kuteeti Ngu Mesiya nkaambo Uci cita citondezyo ca Mesiya.

¹⁵⁷ Mpaawo Wa kaliimvvi akati kabo. Wa kati, "Nkwali Umwi akati kanu. Nse eleli ku guma nsangu Zyakwe, kwaanganuna nsangu Zyakwe. Ngo Umwi uyo batapitzya a Muuya Uusalala a Mulilo."

¹⁵⁸ Elyo buzuba bumwi, kweenda kuzwa akati kabo kwa kaboola Muntu buyo, waka yutuka. Johane wakalanga langa, elyo wa kati, "Amubone, ngooyo Kabelele wa Leza uugusya cibi ca inyika." Elyo cindi na kacita, wa kabona. Wa kati, "Nda Mu zyiba nkaambo kwali citondezyo cali ku Mu tobela." Elyo amulangilile awa, mbaabo bobilo ba bantu batapati mu nyika, kabaimvvi kumeso a kumeso. Johane . . .

¹⁵⁹ Nda yeeya Mwiiyi Roy Davis, oyo wa kandinanika mu mbungano ya Missionari Baptisti, wa kati, "Yebo ulizi, eco caka citika okuya, Billy," kati, "eco caka citika . . ."

¹⁶⁰ Cindi Johane nakati, "Ndi yandikana ku batapitzigwa kuli Nduwe, elyo nkaambonzi Nco boola kuli ndime?" Amulangilile bubombe bwa Johane. Wa kati, "Ndi—Ndi yandikana ku batapitzigwa kuli Nduwe, nkaambonzi Nco boola kuli ndime?" Ngooyo Mesiya a musinsimi Wakwe, imbaakan ya buzuba, imbaakan zya Bbaibbele, kabaimvvi okuya, Umwi kalangide kuli umbi. Johane mu bubombe, kati, "Ndi yandikana ku batapitzigwa kuli Nduwe, nkaambonzi Nco boola kuli ndime?"

¹⁶¹ Jesu wakati, "Cileke eco cibe booboo, nkambo obu cilayandika kuli ndiswe kuzulizya bululami boonse." Elyo, kati, Johane waka Mu leka.

¹⁶² Nda yeeya Mwiiyi Davis. Inga ambweni nkwali uli kkede. Mwiiyi Davis, kutali kugamika ceece ali nduwe, pele Ndi—Ndi—Ndi . . . Wa kati, "Johane, lutaanzi Jesu wa kabapatitzya Johane, nkaambo kakuti Johane takalina batapitzigwa." Elyo mpawo kati, "Mpawo Johane wakabapatitzya Jesu." Eco tii cakalibonya buyo kululama kuli ndime.

¹⁶³ Aboobo buzuba bumwi cindi Muuya Uusalala niwa kali munsi, a mu cilengaano, Nda kabona eco mbo cakabede.

¹⁶⁴ Mpaawo kwakali Johane a Jesu, kabaimvwi kumeso a kumeso, musinsimi oko Ijwi nkolya kasikila. Nkabela Ijwi lyakaboola ku musinsimi. Ameni. Elyo Wa kati, “Cileke cibe boobo. Ca kali luleme. Cileke. Pele obu cilayandika kuli ndiswe kuzulizya bululami boonse.” I musinsimi waka lizi kuti ako kakali Kabelele, alimwi Kabelele keelede kusanzigwa Ka katana tuulwa. Ameni. Aboobo wa ka cicita. Mwa cibona eco na? I musinsimi, mukuba Ijwi, alimwi Lya kaboola kuli nguwe.

¹⁶⁵ [Ii mucizi wakanana mu mwaambo umbi. Ii mukwesu wapa bupanduluzi—Mul.] Ameni.

¹⁶⁶ Johane, musinsimi. I Ijwi liboola ku musinsimi Wakwe. Alimwi Ijwi lya kaboola cigaminina ku musinsimi. “Cila yandika,” caamba kuti *cileevela*, eco caamba kuti, “cila yandika kuli ndiswe kutegwa tuzulizye bululami boonse.”

¹⁶⁷ Oh, obo Mbwe konzya kusiya cibalo lino kwa kaindi kaniini, obo mbo kuyandika kuli ndiswe kuzulizya bululami boonse! I oora lyasika, cintucimwi, twe elede kuzulizya bululami boonse. Tu lizi eco caku cita. Mwabona, twe elede ku cicita, mbo mbubo, kusyoma a moyo wesu oonse.

¹⁶⁸ Amubone, mpawo, tu jana kuti Johane wa kalibombya mwini mu Busyu bwa Leza.

¹⁶⁹ I cintu ca ncico ncakuti, no bantu, mukwesu, mucizi wangu, a beenzuma, nkuziba busyoonto bwako. Mwabona? Uta langanyi obo mboli mupati. Koziba nzila mboli musyoonto. Uli—uli muniini. Toonse tuli boobo. Leza ula konzya kucita kakutakwe ndiswe, pele ta tukonzyi kucita kakutakwe Nguwe. Mwabona? Mwabona? Ta, ta tu konzyi kucita kakutakwe Nguwe, pele Ula konzya kucita kakutakwe ndiswe.

¹⁷⁰ Leza usoleka biyo kujana muntu omwe Ngwa konzya kubikka mu maanza Aakwe. Wa kasoleka lyoonse kucita boobo. Nywebo amubone, muciindi coonse kwiinda mu Bbaibbele, cindi Na kajana Isaya, cindi Na kajana Jeremiya. Mpawo Wa kajana—Wa kajana Samusoni, buzuba bumwi; pele Samusoni wakapa nsana zyakwe kuli Leza, pele wa kapa moyo wakwe kuli Delila. Mwabona, wa . . .

¹⁷¹ Weelede kupa koonse kwako kuli Leza; lulemeko lwako, kulemeka kwako, zintuzyonse zyako ezyo nzyobede. Utapi cimwi, kobona buyo boobo mboli musyoonto, elyo eco nce ncico Leza nca yanda kuti tucite. Nkabela obo mbo bubombe bwini. Nje nzila ba Serafimu aba mbo babede mu Busyu Bwakwe, nywebo mwabona, a kumeso Kwabo mu lulemeko, kabavumbide; matende Aabo, mu lulemeko.

¹⁷² Lino, catatu, Ba kali kukonzya kuuluka. Ba ka jisi mababa obilo ayo aka Ba bikka mu ncito.

¹⁷³ Leza utondezya musinsimi Wakwe awa musyobo wa mulanda Ngwa kabamba, walulemeko, mubombe, a mu ncito. Kuti, mwabona, oyo ngo mulanda wini wa Leza, aba balangila kuli Nguwe. Wa kali kulanga kuli Hezekia oyo wakalisumpula, a kuwa kwiinda ku kulisumpula. Pele mulanda, balanda Bakwe mukati kumbele Lyakwe, bala lulemeko, mbabombe, a mu ncito. Balanda Bakwe, nje nzila eyo mbo beelede kusama; kabasamide lulemeko, bubombe, alimwi caku zumanana kucita milimo ya Taata. Iiyi, munene. Lulemeko, kulibombya, mu ncito.

¹⁷⁴ Mbulonya mbuli mwanakazi muubauba, ngo twa kali kukanana busiku bumwi, ku mukalo. Lino, waa kali mbuto niini yakakanzidwe yakalede mu moyo wakwe, pele, Mumuni mbu wakabalila buyo atala awo nkabela waa kabona kuti oyo wakali Mesiya, tee ca kamutolela ciindi loko ku njila mu ncito. Waa kailuba akwalo nongo ya meenda eyo nja kajisi mu janza lyakwe. Nko kufwambaana oko nkwa kanjila mu ncito. Waa kacita kwaambila bantu. Waa kacita kwaambila muntuumwi umbi, nkaambo kakuti waa kali masimpe kuti waa kajana Mesiya. Ngooyo wakaunka mu munzi, elyo cakufwambaana wa kanjila mu ncito, kaambila bantu.

¹⁷⁵ Wa kali Petro, cindi nakazela nswi busiku boonse, nkabela wakali kkede aa nkowmwe cifumo eco. Cindi Jesu naka lomba bwaato bwakwe, elyo wakali waalide aniini kuzwa ku nkowmwe, alimwi wakali kukambauka ku bantu. Elyo mpawo Wa kati kuli Simooni, “Koya kateye alamfu, a kulosya kunsi kuli nswi zinji. Kulosya ansi.”

¹⁷⁶ Ee, Simooni wakati, “Ndili muzeli wanswi. Ndi—Ndi lizi cindi mweezi a zitondezyo nozili kabotu. Ndi lizi cindi nswi nozyeenda. Nda—Nda kazyalilwa aa ziba eli awa. Nda zela busiku boonse nkabela taakwe nejata nekaba kaswi. Nse jana cintu.” Kati, “Takukwe nswi omuya. Pele ku Ijwi Lyako,” mpaawo we, “Njo losya kanyandi.” Oh, inga wa . . .

¹⁷⁷ Ta tu konzyi kumvwisisyah fintu ezi, nywebo. Elyo Leza takwe bumvwisye munzila zyakwe. Mweelede ku Li syoma, mwabona. Leza tazibwi kwiinda ku luzibo, kutali kwiinda ku lwiiyo. Ula zibwa kwiinda ku lusyomo, alimwi lusyomo luzutu.

¹⁷⁸ “Ku Ijwi Lyako! Ndi lizi takukwe nswi omuya. Pele Ijwi Lyako, ikuti na Wa amba kuti, ‘losya ansi, kuli nswi awo,’ Uyo, lusyomo luyo zibikka awo. Kwa mana. Njo losya kanyandi.”

¹⁷⁹ Ikuti na bantu ba kkede awa, abo bacisidwe alimwi—alimwi bayanda lugwasyo kuzwa kuli Leza, ikuti na wat, “Nda kainda mu mindando ya mipailo yoonse, Nda—Nda kacita fintuzyonse, pele, ku Ijwi Lyako, Ndiyo losya kanyandi. Nda boola ndyoonya lino, alimwi Njo citambula. Nda syoma Ndili mu Busyu Bwakwe. Alimwi Ndili . . .” Alimwi koziba ceeco, antoomwe a bubombe, a lusinizyo a lulemeko. Losya kanyandi. Ko cijata. Leza mbwa kaamba, elyo eco cicibamba boobo!

¹⁸⁰ Elyo tu jana kuti, mbwa kacitila buyo, mukuba muzeli wanswi a kuziba mbo cakabede ku—ku jata cikama canswi cibotu cizula mu bwaato, alimwi wakali muntu mucete, pele cakufwambaana wa kanjila mu ncito cindi Jesu nakati “kuzwida lino uyo zela bantu.” Tii cakamutolela ciindi cilamfu maningi. Wa kalibombya mwini, kawida ansi kumbele ly a Kristo, kati, “Kozwa kuli ndime, Mwami; Ndili muntu sizibi.” Kati, “Nse—Nse—Nse konzyi buyo kukkala mu Busyu Bwako.”

¹⁸¹ I cintu nciconya Isaya nca kacita. Wa kati, “Ndili muntu wa milomo mibi, alimwi Ndi kkala akati ka bantu basizibi.” Oh, ino ncimo nca kalimo!

¹⁸² Petro wakaamba cintu nciconya, alimwi wa kalibombya mwini, kavuntama kumeso akwe a kwaambila Mwami kuti azwe kuli nguwe. Wa kati, “Ta yoowi, Petro, kuzwida lino uyo zela bantu.” Elyo wa kanjila mu ncito mponya awo cakufwambaana.

¹⁸³ Ciindi cimwi, kwakali muntu moofu oyo Jesu ngwa kaponya. Tii cakamutolela ciindi cilamfu maningi kunjila mu ncito; wa kanjila mu ncito, kaya bumwaya mpuwo Yakwe konse akonse. Muntu umwi wakayutuka a kuti, “Baa, nguni wa kuponya?” mupaizi wacita. Wa—wa kaamba, ka mwaambila Oyo waka muponya.

¹⁸⁴ Lutaanzi ba kabuzya bawisi a banyina. Elyo banyina bakati... Ee, lino, ba kali yoowede, nkaambo ikuti—ikuti na bali boonse baamba zya Jesu, baa, ba kali kuyo batanda kuzwa mu sinagogi. Elyo ba ka cijosya ku mwana wabo utakweankwaya. Ba kati, “Walo mupati. Amu mubuzye.”

Elyo wa kati, “Umwi, Jesu waku Nazareta, wandi ponya.”

¹⁸⁵ Wa kati, “Baa, amulumbaizye Leza!” Kati, “Tu, tu li. Ta tuzi cintu kujatikizya Jesu oyu waku Nazareta.” Kati, “Ngu sizibi. Muta Mu lumbaizyi; amupe koonse kuli Leza. Alimwi lino ta tuzi oko Nkwa zwida.”

¹⁸⁶ Ee, oyu muntu moofu waka jisi mubuzyo mubotu kuli mbabo. Elyo wa kati, “Ncintu ceenzu loko. Kuti nywebo nyoonse muli basololi ba kumuuya sunu, elyo oyu Muntu wajula meso angu aofweede, alimwi Nda kazyalwa nkeli moofu, elyo nkabela tamuzi oko Nkwa zwa. Mwabona, lino eco ncintu ceenzu.”

¹⁸⁷ Sa inga Nda amba cintu nciconya? I Leza nguwenya waka syomezya kuboola atala a mbungano Yakwe, mu buzuba obu bwamamanino, nkabela taba jisi bwiinguzi. Oyo utambula uli jisi bwiinguzi.

¹⁸⁸ Kati, “Naa Ngu sizibi na pe, Nse konzyi kwaamba ceeco. Pele cintu comwe Nce zyi; awo ciindicimwi Nda kali ofweede, Nda konzya lino kubona.”

¹⁸⁹ Ciindicimwi Nda kali sizibi; Nda futulwa kwiinda ku luzyalo lwa Leza. Ndi lizi cintucimwi ca kacitika kuli ndime.

Nda...kuli cintucimwi caka citika. Mula konzya ku ciita kuti “mubumbulusi uusalala” na mula konzya ku ciita kufumbwa mbo mu yanda, pele Lyā kandi futula, myaka itandila ku makumi otatwe aimwi yainda. Elyo ciya buba kabotu ciindi coonse, aboobo Nda—Nda cibotelwa.

Muntu umwi wakati, “Wa kanyongana.”

¹⁹⁰ Nda kati, “Ee, mpawo kondileka endikke. Ndili kabotu munzila eyi kwiinda Mbwe kabede munzila imbi, aboobo kondileka buyo kukkala munzila Mbwe bede. Ndi limvwa kabotu munzila eyi, a kucita kabotu maningi. Nda konzya kucita kunji.” Iiyi, munene.

¹⁹¹ Wa kanjila mu ncito mpoonya awo. Iiyi, munene, waka mwaya mpuwo Yakwe konse akonse.

¹⁹² I bantu ku Pentekoste, mbu ba kabona buyo kuti Leza waka zulizya cisyomezyo Cakwe! Jesu wakati, “Amubone, Nda tuma cisyomezyo,” Lugwalo, “cisyomezyo ca Taata Wangu ali ndinywe. Pele amukamuke,” oko *nkulindila*, “amukalindile mujulu ku munzi waku Jerusalema kusikila mukazuzigwe Nguzu zizwa Kujulu.”

¹⁹³ Kutali mundando wa mipailo mutaanzi, na kwiinda mu ciindi citaanzi, pele amukkale buyo okuya kusikila cacitika, mwabona. “Kusikila,” kutali buzuba bomwe, mazuba obilo, na myaka ili kkumi, “kusikila mane cacitika.” Amukkale kusikila!

¹⁹⁴ Elyo cindi niba kazuzigwa a Muuya Uusalala, ba kanjila mu ncito mpoonya awo cakufwambaana; aanze mu tugwagwa, a kukwiila, a kuyzana, a kulilemeku mbuli bantu bakoledwe, a kwaambaula mu myaambo imbi, alimwi ino nkulilemeku bumwi! Ba kali mu ncito mpoonya awo cakufwambaana; mbu bakali bombya buyo, kanjila a kujala mulyango, a kulindila aa Ijwi lyā Leza.

¹⁹⁵ Oh, eco nco twabona, beenzuma! Ndi lizi kuya busiya alimwi Nse yandi ku mukkazika kwa ciindi cilamfu. Pele, amulange! Eco nco twabona, mu i—mu myaka yamamanino misyoonto, kweelede kubikka umwi aumwi wesu mu ncito. Ce elede ku tubikka mu ncito. Inzi? Lutaanzi, tubambe basilulemeko, balibombya, a mu ncito. Elyo luyandisyō kalupya mu myoyo yesu, kusoleka nko tukonzya, ku bona inyika isweekede. A ku bona zitondezyo ezyo Leza...Akwalo kunselelo, mbuli Mbwe zyi, kuli umwi nguwenya wamamanino oyo Mbungano ngo iya kutambula kakutanaba mulilo uuwa kuzwa ku julu. Nguwenya Musumpululu wa Mulilo oyo waka bonwa kaindi okuya mu nkanda, nguwenya Oyo wakaumina ansi Musalali Paulo, ngonguwe Oyo akwalo ujisi cifoto Cawo eco caka bwezegwa ca Nguwo, nkoonya okuno kaucita cintu nciconya Nco wa kacita okuya, Mesiya nguwenya.

¹⁹⁶ Ikuti na wabikka buumi bwa lupusi mu lunamunywa, inga lwazyala mapusi. Ikuti na wabikka buumi bwa cisiko ca

musaansa wa girepu mu ii—ii—ii cisamu ca mapia, inga cazyala magirepu, nkaambo mbo buumi buli muli ncico.

¹⁹⁷ Elyo ikuti na eci nco tubona a kuziba, bali zyuulu koonse ku inyika bali Uzyi, sayaansi yapa bumboni kuli Nguwo, kulikoonse, zifoto zyaka kkopwa. Uli mpoonya ano lino. Obo mbwini, mbwini loko. Uli mpoonya ano lino! Elyo ikuti Ta uzyali musyobo nguwenya wa buumi Mbu wa kacita cindi Ni wakali mu muntu, Kristo Jesu, ikuti Ta uciti cintu nciconya mu Mbungano Yakwe, mpawo cili lubide. Pele ikuti na Uzyala buumi mbubonya, weelede kuba Musumpululu wa Mulilo nguwenya oyo wakasololela Israyeli. Utu sololela ku Nyika ya Cisyomezyo. “Mu ng’anda ya Taata Wangu kuli makkalilo manji,” cisyomezyo eco Nca katupa, elyo Utu sololela okuya. Elyo tula Ubona kusimpikizigwa mubuzule, Ijwi ly a Leza ly a yubululwa. I balema baleenda, basinke matwi balamvwa, boofu balabona, bafwu balabusigwa; miyeeyo ya moyo taikonzyi kusiswa, ilaitwa mpoonya awo, milimo njiyonya Nja kacita. Ino ncinzi, muntuumwi na? Ngu Mesiya! Ngu Mesiya, Leza, Muuya Uusalala, Oyo nguwenya. Walo weelede kubikka . . .

¹⁹⁸ I mbungano ya Pentekoste, mubusena bwakusoleka ku Usa bula, yeelede kuba mu ncito, kulikonse, antoomwe a bubombe a luyandisyo, kusoleka Ku tondezya iku bantu basweekede a bali mukufwa. Twe elede Ku lemeke. Twe elede ku Mu yanda. Kulibombya tobeni, kulibamba kuba basilulemeko, a kuba mu ncito mbuli ba Serafimu aba mbo bakabede, a lulemeko a bubombe. Kusimpikizigwa caantangalala, kasyomezegwa kuli ndiswe mu mazuba aakumamanino, elyo Ngooyu we! Tula Ubona. Jesu mbwa kaamba, kuti Uyo citika. Ngooyu Mpouli, kaitana buyo kuumpwa. Eco citondezyo ca Kuboola Kwakwe citondezya kuti Kuboola kuli munsi ndyoonya lino. Kula konzya kuboola kufumbwa ciindi. Taakwe cintu nce bwene cisinkila Kukwempwa kwa Mbungano ndyoonya lino.

¹⁹⁹ Ee, kwaandwa, caando ca munyama cili ku lubazu lumbi, amuyeeye. Mwabona, buzangi, bwaboola mukati mpawo mbuli mbungano. Lino amulindile, Nda, ambweni Nda ambide cintucimwi. Nje nzila yangu ya kucibona, mwabona. Elyo amulangilile.

²⁰⁰ Ijwi ku ijwi, lyazulizigwa kale. Lye elede ku tubikka mu ncito. Eco cili luleme ncobeni. Twe elede kuno leta muntu oonse uusweekede, ku Bwami bwa Leza, obo mbo tu konzya. Nkaambo, bumwi bwa mazuba aya muyo baleta elyo tacika gwasyi pe. I mulyango uno jalistwe, kuno nyina limbi. Oh, inga kabano nyanyamukidwe mu kuyeeya, a ku botelwa, a koongolola, a kusotauka mujulu ansi, a kutaminina *ceeci*, nywebo mulizi. Pele ciindi nakalindu woona naka sika kuula Mafuta, taaka Aa jana pe. Elyo sena mwa kasola ku bona ciindi, mu makani oonse akale aa mazuba aya aakumamanino, kuti kwakasola kuba ciindi cakuti bana Presbyteria, bana Luther, zintuzyonse

zimbi, basoleka kuboola ku Mulumbe wa pentekoste? Ncinzi Jesu nca kaamba? "Kuciindi niba kaboola kuula, cakali ciindi Nabwiinga naka njila," ba nakalindu basongo baka njila. Tiiba kajana Mafuta. Tiiba ka Aa jana. Kwa mana. Oko nkweendelana ku Lugwalo.

²⁰¹ Elyo mwabona zitondezyo ezi a zintu ezi zimbi, zintuzyonse zikkede mu bubambe ncobeni bwa Kuboola Kwakwe.

²⁰² I kulangilila kwaciloba, Wa kanjila. Bamwi bakoon mu kulangilila kutaanzi, kwabili, kwatatu, kwane, kwasanu. Elyo mu kulangilila kwaciloba kwakaboola loompololo, "Amubone, Sibwiinga waboola!" I bukkalo bwa mbungano yaciloba, oko nkulangilila, bukkalo obo bwa kulangilila. Elyo obu Mbukalo bwa Mbungano ya Laodikeya, kumamanino a mbubo. Ameni. Oh, nku... Nkaambonzi tamu sinsimuki, nywebo no basalali ba Mwami, nkaambonzi nco mufukula kakuli mamanino aya buswena?

²⁰³ Pele, amuyeeye, mbungano mu Bukkalo bwa Laodikeya iyooba ikasaala biyo. Wa kati, "Nkaambo waamba kuti uli 'vubide,' alimwi—alimwi uli 'jisi zintu zyoonse.'" Elyo kati, "To zyi kuti uli cinswe, moofu, mucete, uupengede, nkabela to cizi." Kati, "Njo kuswida kuzwa ku mulomo Wangu."

²⁰⁴ Elyo mpaawa mpo tubede kumamanino aa zintu zyoonse, mamanino amakan aakale, mamanino aa lusumpuko. Mula konzya kubona. Amusondele mu kagwagwa.

²⁰⁵ Nda kali kukanana kuli namutekenya wa kkabbu, wa kali kuya bundileta. Wa kati, "Ee, nzila biyo Nje konzya kuziba, cindi Nda bona muntu awa ulilemeki kabotu, Nda ziba kuti mweenzu." Mwabona? Lino, oyo ngumwi wa banamutekenya banu wa kkabbu wa kaamba ceeco. Kati inga bayo... nzila.

²⁰⁶ Takuli okuno biyo, pele cili ku masena oonse. I mamanino aa zintuzyonse; obo bantu, balunya, a misyobo yoonse ya zintu zibyaabi, a zeezyo nzo bacita. I inyika ya pilingana. Amusondele mu tugwagwa. Amwiilange buyo, oh, ma, kulikonse! Kutali biyo mu America; kulikonse, baa, ngu ii—ngu Sodoma wa sunu.

²⁰⁷ Taakwe ciyo syaala, pele kuumpwa. Elyo, kwa mana, iyo salazigwa. Leza uyo cicita. Milao Yakwe ila cisesa. Ceelede ku citwa mu nzila eyo. Cindi cisiko ca popwe cakkwanya buumi bwaco, ceelede kunyonyoonwa. Cindi dubaluba lyakkwanya buumi bwalyo lyeelede kufwa. Elyo lusumpuko lwakkwanya mulimo walo. I bukkalo bwa mbungano bwakakkwanya ciindi cab. I tubungwe twa kakkwanya cindi cato.

²⁰⁸ Eci nciindi cakukamantana. Njeeyo United Nation, mbungano ikamantene, a makante akamantene. Ino ncitondezyo canzi? Kristo a Nabwiinga Wakwe kabakamantana. Eco mbo cibede. Zyalo nzimvule zyoonse a zikozanyo. Zintuzyonse ziyanda kuba a nkamu ya bubelesi, aboobo ncitondezyo. Kristo ulibambilila kukamantana a Nabwiinga Wakwe, Cilalilo ca

Mucado kucitika mu mulengalenga, aboobo ceelede kuwaala mbungano mu ncito cindi twa bona zitondezyo Zyakwe awa zili munsi. Oh, ma! Zyonse zintu ezi nzitondezyo kuli ndiswe, kulikonse. Oh, twe elede kuba mu ncito!

²⁰⁹ Swebo, mbuli musinsimi wakale, Isaya, tula bona awo bantu basikulisumpula mpo bakasika. Tula bona eco, otu tubunga tubuka a kwaamba, “Ee, nkaambo kakuti tozulilwi kuli ndiswe, toli muli njiyo nokuba,” tula bona eco caka citika kuli mbabo. Ino basweekelwa nzi? Mbulanya buyo mbo baumwa a cinsenda cazibi, a kutasyoma, bala—bala sweekelwa kujatilila kwabo aa Ijwi lya Leza. Bamwi bantu aba basola, bala sintanya, basweekelwa kujatilila kwabo aa Ijwi, aku Li sintanya a tuyanza twa buzumini. Ino ncinzi nco bali janina? Ii busofwi bwa cinsenda. Mbo mbubo.

²¹⁰ Mbuli Uziya wakale, kusoleka kubweza busena bwa mulimo uunanikidwe, elyo kata jisi cintu pele buyo digrii lya bwiiyi, na cintucimwi. Leza ta yandauli digrii lya bwiiyi; Ula ngaula myoyo ibombede, muntuumwi uyo Mu syoma. Pele twa bweza bantu a kuba yiisia kuba mabishopo azintuzyonse zimbi, makkadinolo abambi, kabayiisia maningi kujata ku mulimo wa zya Buleza antoomwe lwiiyo lwakunyama. Tu yandikana lubapatizyo lwa Muuya Uusalala, kubweza mulimo oyo. I Muuya Uusalala ngo Mubanzi wesu. Ngo Nguwe Uli yubununa Mwini akati kesu, citondezyo ca oora, mazuba aakumamanino. Pele swebo, mbuli Hezekia, kalisumpula, bayeeya buyo kuti bala konzya kubweza masena abo.

²¹¹ Amulange eco nguzu zya cilengaano ncozya kacita ku musinsimi. Lino, wa kali musinsimi. Wa kali cilongo ca Ijwi lya Mwami kusikila nkuko. Wa kali salidwe, kazyalwa kali musinsimi. Kumalekelo wakapa buumi bwakwe, kazapaulwa mu tubeelabeela asaha. Pele tu jana kuti oyu musinsimi mupati, cindi naka bona cilengaano eci kuzwa ku Julu, aku bona mabambe, obo Leza mbwakali kubamba bantu Bakwe, baa, caka citya musinsimi kulyambilila kuti wa kali sizibi.

²¹² Elyo tu yanda kuba bapati loko, a kusama musyobo umwi wakkola pati lyakuli tukumwida, musyobo umwi wa zisani, nywebo mulizi, ezyo zitubamba kulibonya basalali a basilulemeko maningi. Kunyina busalali a ndiswe. Ta tukonzyi kusalala; busalali mbu bwa Leza. Mwabona? Ninconzyo. Taili mbungano iisalala, tauli mulundu uusalala; ngu Leza uusalala. Mbo mbubo. Kutali bantu basalala; Leza uusalala! Ngu Leza mu bantu. Petro waka tondeka ku Mulundu wa Kusandulwa, “mulundu uusalala,” cakali kwaamba kuti Leza uusalala wakali aa mulundu. Amulange ali ncico lino, mwabona. Pele wakali Leza uusalala okuya, Busyu bwa Leza, obo bwaka cibamba kusalala.

²¹³ Bwalo Mbusyu bwa Leza akati kesu lino obo buleta busalali, kutali busalali bwangu, kutali bwatu, pele busalali Bwakwe. Busyu Bwakwe mbo buleta busalali. Twe elede kulibombya tobenu, kulivumba lwesu mu lulemeko, bubombe, a kwaamba, “Mwami Jesu, kondi tambula mu Bwami Bwako.” busalali Bwakwe, kutali bwesu. Muuya Uusalala!

²¹⁴ I musinsimi waka lyaambilila, kamu citya kwaamba, “Ndili muntu wa milomo iitasalali.” Ii musinsimi! Leza, tu yanda cilengaano cimbi mbuli ceeco! Cindi naka bona atala alya, i... kabona Nguzu ezi zisalazyi izya Leza.

²¹⁵ Lino amulangilile obo Leza mbwa kacita. Wa katuma umwi wa ba Serafimu aku bweza lumano, kabweza kkala lya mulilo lipya kuzwa ku cipaililo aku libikka mu maanza Aakwe, kaboola akulazika mutwe wa Isaya alimwi a kuguma milomo yakwe, kat, “Milandu yako yamana.”

²¹⁶ Mpawo Isaya wakaiya ciiyo cimbi. Inga Nda losya ceecei mukati. Inga ka ci teeeli maningi, pele Nda syoma cila cita. Sa mwakabona, Leza usalazyi basinsimi Bakwe kubelesya Mulilo, kutali kwiinda ku lwiyo lwa bukombi na bbuku lya musyobo umwi. Mwabona? Ula salazyi bantu Bakwe kubelesya Mulilo, Muuya Uusalala a Mulilo; kutali kwiinda ku twaabmo tulembedwe itwa tuyanza twa buzumini, na mabbuku na cintucimwi nco elede kwiiya, cikama ca mipailo, azimwi zimbi. Ula basalazyi kubelesya Mulilo uzwa ku cipaililo. Mbo mbubo Mbwa mubikka mu mabambe. Inzya. Iiyi, munene. Mbo mbubo Mbwa kasalazyi basinsimi Bakwe ku matalikilo, cindi bali mwaanda a makumi obilo niba kali mu ng’anda ya mujulu, Muuya Uusalala wakaseluka, a myaambo ya Mulilo yakakkala ali mbabo. Ba kasalazigwa a kulibambila mulimo. Mbo mbubo obo Leza mbwa salazyi. Kutali kwiinda ku kwiiya, kubweza Digrii Taanzi lya ku kkolegi, na DD., Ph. D.; pele kutambula Mulilo Uusalala kuzwa ku Julu, oyo ugusya kubeja kuzwa ku milomo yako, a ku gwisya businyama kuzwa kuli nduwe, kuumpa kumanizya zintu ezyo, ayo masifwilila aa—aa inyika, aku bikka Busyu Bwakwe mukati aku kkala mu muntu oyo. Mulilo Uusalala ngo nguwe Leza ngwa belesya kusanzya Mbungano Yakwe. Isaya wakaciya eco. Twe elede ku ciiya, kuti Leza tasalazyi kubelesya luzibo. Ula salazyi kubelesya Mulilo.

²¹⁷ Nywebo mwabona obo mbwa bede, musinsimi wabikkwa mu mabambe. Lino Wa kasalazyi milomo yakwe, kagusya milandu yakwe. Mpawo nakamana kucita, waka lyaambilila, kalibombya mwini, wa kat, “Ndili muntu wa milomo iitasalali,” cindi naka bona Busyu bwa Leza.

²¹⁸ Sa mulandi tobela? [Mbunga yaamba, “Ameni.”—Mul.] Ino ncinzi nco tu, ino ncinzi nco tuzi lino? Tuli mu Busyu bwa Leza. Mbo mbubo. Tuli kkede ncobeni ndyoonya lino. Sa mula... Ta tukonzyi kucimvwisisya kabotu, pele lino tuli mu Busyu bwa

Leza, kubona Leza. Sena mula syoma kuti Mpali ano? [“Ameni.”] Ninconzyo, Mpali ano. Tu . . . [Kabeela katakwe cintu aa teepu.]

²¹⁹ Ndili munyoko. Pele Wa kati, “I milimo eyo Nje cita, Uyo . . . muyo cita anywebo.” Sena nce ncico Nca kaamba? [Mbunga yaamba, “Ameni.”—Mul.] Yaa. Ikuti na Mpali ano, Muuya Wakwe mpouli ano. Eco nceci Mu bamba. Mpawo ikuti na tula konzya kulipa tobени a kugusya miyeeyo yesu. Mbuli ceeci citakwe miyeeyo, mpawo jwi limbi lila konzya kukanana kwiinda muli ncico. Nje nzila eyo. Ikuti na tula konzya kulisukumuna tobени. Ngaaya maseseke, koligusya lwako! Mpawo Leza ula . . . Gwisyia kuyeeya kwako omwini. Gwisyia nzila zyako zini, elyo mpawo lekela Leza aende. Ikuti na Ngu Jesu Kristo, mbobuca nguwenya, sunu amuya myaaka, mula cisyoma? [“Ameni.”] Amu Mu syome ndyoonya lino a kubona kuti na mbo cibede.

²²⁰ Ndali kulangilila mulombwana oyu muniini ukkede awa, nkoonya okuno kumbele lyangu. To jisi kkaadi lya mipailo. Yebo, ikuti na Leza uyo ndaambila nco kkalilide awo, ula cisyoma? Ndi penzi lya kumuuya, uli nyongene koonse nkabela tozi cakucita. Ikuti na kuli luleme, tambika janza lyako. Yaa, lyamana lyoonse. Bweza Ijwi, eco Nce wamba, nkabela lyamana lyoonse.

Sena mula syoma obo? [Mbunga yaamba, “Ameni.”—Mul.]

²²¹ Oyo mulindu uusiya ukkede nkoonya kusule okuya, uulangide ali nguwe; ujisi penzi lya moyo. Sena ula syoma kuti Leza uyo kubamba kuba kabotu? Masimpe. Ula syoma na? [Mucizi waamba, “Ameni.”—Mul.] Yaa, ula konzya kutambula kuponesegwa kwako.

Sena mula syoma kuti Ngu mbobuca nguwenya a . . .

²²² Oyo mwaalumi, oyo mukuwa utambikide janza lyakwe, sa ula ndisyoma kuba musinsimi wa Leza, mulanda Wakwe? Nse kuzi pe. Uli mweenzu kuli ndime. Sena uli jisi kkaadi lya mipailo na cimwi? Uli mwaalumi buyo ukkede awa. Yaa, munene, ujisi eikoto mu kameneno kako. Mbo mbubo. Sa mbo mbubo? Sena ula ndisyoma kuba musinsimi Wakwe? Ula ndisyoma a moyo wako onse na? Ujisi limbi, ujisi mukuli ku moyo wako. Ujatikizya musimbi muniini, muzukulu wako. Ujisi janza bbi. Mbo mbubo. Sa mbwini? Kuli kuswaangana kubotu. Kwakaindi buyo kaniini. To zwi kokuno. Yebo uzwa ku Connecticut. Elyo zina lyako ngu Wilson. Zina lyako taanzi ngu Art. Art Wilson. Mbo mbubo ncobeni. Sa mbwini?

Sena mula cisyoma? [Mbunga yaamba, “Ameni.”—Mul.] Mbubo!

²²³ Kuli mulindu ukkede nkoonya kusule okuno, mulindu uusiya, libonya mbuli kuti usamide bbaki lya yello, inzya, grini uutubuka. Ula komba. Ulijisi kkaadi lya mipailo na? [I mucizi waamba, “Nse yandikani lyomwe!”—Mul.] To jisi kkaadi lya mipailo na? To jisi. Ula ndisyoma kuba mulanda Wakwe? Ndili

mweenzu umaninide. Tuli mikowa yobilo ya bantu. Yebo, pele ula komba. Oyo nduwe. Iiyi. Sena ula syoma kuti Leza ula konzya ku ndaambila penzi lyako? Ujisi cikoto. Mbo mbubo. Ujisi cintucimwi ku moyo wako, akwalo. Ula komba. Nca mweenzinyoko, ujisi penzi lya nsa. Ikuti na obo mbombubo, tambika janza lyako. Yaa. Lino ula konzya kutambula kulomba kwako.

²²⁴ Nda zundikizya lusyomo lwako! Ino ncinzi? Cindi musinsimi naka bona kuti wa kali mu Busyu bwa Leza, wa kalibombya mwini. Amulange, lutaanzi wa kalibombya mwini, mpawo Mulilo waka musalazya. Elyo Mulilo niwa kamana ku musalazya, mpawo wakali Isaya wakasalazigwa. Cindi na kamvwa Jwi lya Leza, kati, “Nguni uta Ndi inkile?” wa kanjila mu ncito, “Mpaawa mpe Ndi, kondi tuma.” Oh, ma!

Cindi kkala lya Mulilo nilya kaguma
musinsimi,
Kumubamba kunjoloma mbuli kunjoloma
mbwakali kukonzya kuba,
Cindi Jwi lya Leza nilya kati, “Nguni uta twi
inkile?”
Mpawo wa kaingula, “Simalela, mpaawa mpe
Ndi, kondi tuma.”

²²⁵ Ameni. Oko kwakali kwiita kwa Isaya usalala, Muuya Uusalala niwa kamana ku musalazya. Ta kali kuyandikana luzibo lulilonse lwa seminari, ta kali kuyandikana luzibo lwa bbuku lili lyonse. Wa kasalazigwa kwiinda ku Mulilo wa Leza, a kwiitilwa mu ncito. Cakali cinzi? Cindi naka bona Leza mu ncito, waka njila mu ncito.

²²⁶ Tula bona Leza mu ncito. Nciindi ca mbungano kunjila mu ncito a kuba mikozyanyo ya boobo Leza mbwa bede. Sena mula syoma eco? [Mbunga yaamba, “Ameni.”—Mul.] Mbangaye bayanda kulyaambilila bubi bwanu a zintuzyonse lino, a kuti, “Leza, ndisalazye”?

Ponya mwaalumi mukubusyi.

Cindi kkala lya Mulilo nilya kaguma
musinsimi!

²²⁷ Atwi imikile ku matende esu. Njo ima mpoonya awa, ciindi ciya bumana. Syoma a moyo wako oonse lino.

²²⁸ Ndi yanda kuti mukotamike mitwe yanu. Amuyeeye, nakamana kubona Leza! Ngooyo Mpo uli alubo. Ameni. Lino kufumbwa cintu cila konzya kicitika. Kufumbwa cintu cila konzya kicitika.

Cindi kkala lya Mulilo nilya kaguma
musinsimi,
Kumubamba kunjoloma mbuli kunjoloma
mbwakali kukonzya kuba,

Cindi Jwi ly a Leza nilya kati, “Nguni uta twi inkile?”

Mpawo wa kaingula, “Mpaawa mpe Ndi, kondi tuma.”

Kanana, Mwami wangu, (mutambike maanza anu lino) oh, kanana, Mwami wangu,
 Kanana, elyo Njo fwambaana ku Kwi ingula;
 Kanana, Mwami wangu, kanana, Mwami wangu,
 Kanana, elyo Njo ingula, “Mwami, kondi tuma.”

Oh, ibali mamilioni lino bali mu cibi a mause bali mukufwa, (amulange mu tugwagwa twanu)

Oh, amuswiilile kuusa a kulila kwabo kwakubijilwa;

Oh, kobinda, mukwesu, kobinda ku kuvunwa kwabo;

Ingula cakufwambaana, “Simalela, mpaawa mpe Ndi.”

Kanana, Mwami wangu, (kocisinizya kwini lino) kanana, Mwami wangu,

Kanana, elyo Njo fwambaana ku Kwi ingula;

Kanana, Mwami wangu, kanana, Mwami wangu,

Kanana, elyo Njo ingula, “Mwami, kondi tuma.”

²²⁹ Atu bikke maanza esu ku moyo wesu, kuciindi notu ng'ung'una. Bamba kulyaambilila kwako, kwaamba, “Mwami, Ndili mwaalumi wa milomo iitasalali. Ndili mwanakazi wa milomo iitasalali.” Atube a kulyaambilila kwini, tu yooba a lubukulusyo lwini. Lutaanzi amusalazigwe. Amulangilile, musinsimi wakacita kusalazigwa lutaanzi. I Mulilo waka muguma, mpawo wa kali mu ncito. “Mwami, kondipa busungu mu moyo wangu. Kobikka cintucimwi muli ndime Nce ta jisi, Mwami. Kobikka luyandisyo a Mulilo Wako muli ndime, mpawo undi tume.” Lino bamba kulyaambilila kwako, syoma Leza a moyo wako onse.

Kanana, Mwami wangu, kanana, Mwami wangu,

Oh, kanana, elyo Njo Kwi ingula cakufwambaana;

Kanana, Mwami wangu, kanana, Mwami wangu,

Kanana, elyo Njo ingula, “Mwami, kondi tuma.”

[Mukwesu Branham watalika kung'ung'una—Mul.]
 Kumubamba kunjoloma mbuli kunjoloma
 mbwakali kukonzya kuba,
 Cindi Jwi lya Leza nilya kat, “Nguni uta twi
 inkile?”
 Mpawo wa kaingula, “Simalela, mpaawa,
 kondi tuma.”

²³⁰ “Kanana.” Lino lekela Leza akanane ku moyo wako lino; cakulibombya kwini, cabubotu, cabulemu mu Busyu Bwakwe. Sizibi aumwi, musalali aumwi, oku nku kwesu toonse. Nku kwangu. Nkwa boonse. Mboobu Busyu Bwakwe, Uli waano obo Mbwa kaamba kuti inga Uyo cita. I citondezyo eco Nca kaamba kuti inga tuyu tumbula, ngooyu Mpali we. Kuciindi ciimbo nocilila cabubotu, atulyaambilile buyo bubi bwesu. “Nseli cintu pe, ciliconse, Mwami. Kanana ku moyo wangu. Kondi salazya lutaanzi, Mwami. Tuma Muuya Uusalala a kundisalazya. Ndi lizi Ndili mu Busyu Bwako. Ndi Ku bona mbuli Isaya mbwaka Ku bona, koenda. I busena buzwide, kutali busi lino, buzwide Mumuni, buzwide Bulemu.”

²³¹ O Mwami Leza, Mulengi wa majulu a nyika, mbuli ceeci mbocili ku mizeeza yesu, twa bona eco cicitika ku bantu balisumpula maningi. Boonse bakali mikozanyo kuli ndiswe. Twa bona oko kulibombya a mupailo, kuli bakafutulwa, ncocaamba.

²³² Nda komba, Taata Wakujulu, ndyoonya lino ku bbunga eli lya bantu a kuli lwangu. Mwami, kogusya cintu cili coonse kuzwa kuli ndime eco citali mbuli Nduwe. Ndi—Ndi—Ndi—Ndi yanda kuti Upone muli Ndime, Mwami. Ndi yanda Muuya Wako antoomwe i—antoomwe a bweendelezi. Ndi yanda kuti Upone muli ndime cakumaninina, cakuti Nse cili ndime pe, kutegwa Nde—Nde ende a kwaambaula a kupona buyo muli Nduwe. Ko cipa, Mwami. Mpaawa mpe Ndi. Kondi salazya, Mwami. Kosalazya mbungano eyi. Kotu salazya toonse, antoomwe. Gwisya malwazi, gwisya cibi, gwisya kutasyoma, gwisya kudonaika, cigosye coonse. Lekela Muuya Uusalala uboole lino a kkala lya Mulilo kuzwa ku Cipaililo, insasi impya ya pentekoste, a kusalazya moyo aumwi omuno. Ko tubweza, Mwami. Tuli Bako. Tula Ku syoma. Ko cipa, Taata.

Kanana, Mwami wangu,
 Kanana, elyo Njo ingula, “Mwami, kondi
 tuma.”

²³³ Boonse abo bayanda, a bayo cita, a kuba a maumi anu asalazigwa kuli Kristo, cabupya, ndyoonya lino, alimwi uyanda kulisalazya lwako mu Busyu Bwakwe!

²³⁴ Ikuti na Nda talika kwita ceeco Nce bona, inga Nda . . . inga catola muntu aumwi omuno, Nda syoma, ndyoona lino. Ndili muzi. Nywebo mulizi kuti inga tee Nda ima waano a kwaamba

ceeco mbuli mulanda wa Kristo kakutakwe kuti Nko cili koonse. Muli mu ciimo ndyoonya lino ca kutalisya pentekoste impya. Cili bwini ncobeni, beenzuma.

²³⁵ Amulibombye buyo nobeni. Vumba ibusyu bwako, vumba matende ako, koswena buyo munsi Lyakwe. Kofugama ansi a kubamba kulyaambilila kwako, a kusyoma. Sena mula yanda kucita ceeco? Ikuti na mula cita, amu tambike buyo maanza anu, kuciindi no twiimba “*Kanana, Mwami Wangu.*”

Kanana, Mwami wangu, (komba lino) kanana,
Mwami wangu,
Kanana, elyo Njo fwambaana ku Kwi ingula;
Oh, kanana, Mwami wangu, kanana, Mwami
wangu.



KOONGELEZYA TNG63-1114
(Influence)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa Bwane mangolezya, Vumbipati 14, 1963, ku Marc Ballroom mu New York, New York, U.S.A., wakagusigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obu busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2019 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitamininidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyabolwa mu ciyanza cakujokolosya, kusandululwa mu misyobo iimbi, na kubelesegwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org